

سرى للغاية

اجتماعات مجلس الرئاسة
القاهرة - قصر القبة فى ١٠ أكتوبر ١٩٦٢
(الاجتماع الرابع)

الحاضرون

الرئيس جمال عبد الناصر، عبد اللطيف البغدادى..
نائب رئيس الجمهورية، عبد الحكيم عامر.. نائب رئيس
الجمهورية، زكريا محى الدين.. نائب رئيس الجمهورية،
حسين الشافعى.. نائب رئيس الجمهورية، كمال الدين
حسين.. نائب رئيس الجمهورية، أنور السادات، حسن
ابراهيم، على صبرى.. رئيس المجلس التنفيذى، نور
الدين طراف، أحمد عبده الشرياصى، كمال الدين
رفعت.

المحتويات

الصفحة	الموضوع
١	١- تطور الموقف فى اليمن بعد الثورة ويعد ارسال قوات مصرية
	٢- ما تم فى جلستى المجلس التنفيذى.. تنظيم مجلس الرئاسة ولجانه المختلفة
٣٢	٣- محصول القطن وقيمته وتسويقه
٣٩	٤- النياشين وضرورة تطويرها
٤٣	٥- الوزراء يجب أن يفتحوا بابهم للناس
٤٥، ٥٨-٦٧	٦- تشكيل اللجنة التنفيذية العليا
٥٤-٥٨	٧- الرئيس السلال يطلب مزيدا من القوات المصرية فى اليمن

سرى للغاية

قرارات مجلس الرئاسة

فى ١٠/١٠/١٩٦٢

دراسة الموقف فى اليمن، وبحث العدوان السعودى الأردنى الواقع على الحدود الشمالية لليمن، وكذلك التدخل الموجه الى اليمن من الجنوب. وقد أسفر رأى المجلس على أن الجمهورية العربية المتحدة ستقف بكل قواها بجوار اليمن فى مقاومة أى اعتداء عليها. نظر المجلس فى مشروعات القرارات المقدمة من المجلس التنفيذى، وستعلن هذه القرارات بعد تصديق رئيس الجمهورية عليها.

سرى للغاية

اجتماعات مجلس الرئاسة

القاهرة - قصر القبة فى ١٠ أكتوبر ١٩٦٢

(الاجتماع الرابع)

عبد الناصر: زى ما تكلمت قبل كده، ازاي ننظم نفسنا؟ مافيش داعى نقعد نستنى المجلس التنفيذى الحقيقه اللى يخلصه يحييه لنا، الحاجات اللى عايزة تدخل فى الجدول أقصى يوم ممكن تكون موجودة يوم الأحد، وبعدين يوم الأحد عبد المجيد بيرتب مشروع الجدول، وبعدين بعد كده بنمشى لأن بيبقى عندنا الاتنين والثلاث بنيجى الأربع لأن النهارده لما قابلتك ماقريتش، وبعدين المجلس التنفيذى بيبجى الجمعة.

والله أحسن ومفيش حاجة مستعجلة للقوات المسلحة، بعد كده اذا كان فيه حاجة مستعجلة علشان الحقيقه العمل ببقى برضه مضبوط بنمشى باستمرار.

فى رأى أنا بالنسبة للجدول نسيب أول نقطتين: أول نقطة بالنسبة للرئيس.. اذا كان عنده حاجة يقولها. تانى نقطة بالنسبة لرئيس المجلس التنفيذى.. الحاجات اللى عملها وماعملهاش، أو ببقى المجلس التنفيذى برضه بيقول لنا الدنيا ماشية ازاي؛ لأن برضه عايزين اجتماع زى ما قال امبارح.. ونعمل ايه والكلام ده.

برضه من ناحية تانية، يقول رئيس المجلس التنفيذى إن كان عنده حاجة بالنسبة للحاجات اللى عملها والنشاط التنفيذى اللى بيقوم بيه.. فى عشر دقائق يقول لنا، اذا كان مفيش حاجة يقول ما عندوش حاجة. وأى اقتراحات أخرى لكم بالنسبة لهذا للموضوع.

وأنا بقول كده ليه؟ مش عايزين بس تيجى مواضيع من بره، ولكن بدل ما ندخل نبص نلاقى المواضيع تطراً على الـ mood لأى واحد طبعا مفيش ما يمنع إن أى واحد يقدر يتكلم فى أى موضوع فى جدول الأعمال، أى واحد يقدر يتكلم فى موضوع فى جدول الأعمال بس على أساس مذكرة لهذا الموضوع فى مواعيد أقصاه يوم السبت؛ بهذا ننظم عملنا ونمشى بطريقة يعنى..

بيبقى يعنى يوم الأحد عبد المجيد يجيب لى الجدول وبعدين يتوزع بعد كده. نبتدى نطبق ده من النهارده ونمشى إن أنا هاتكلم النهارده عن المواضيع الجارية عموماً. المواضيع الجارية أساساً: الموضوع الأول هو موضوع اليمن: بالنسبة للعملية فى اليمن الموقف قطعاً سيتطور، من ٦ أيام هو فيه حشود على حدود السعودية وعدت الحدود يوم الجمعة.

سرى للغاية

عامر: يوم الجمعة؟

عبد الناصر: لا.. عدت الحدود من أول امبارح، وهم فعلا خدوا صاعقة وكان فيها قوة يمنية فى القلعة وهى قرب الحدود. الحشد السعودى ماشى باستمرار والحشد الأردنى ماشى باستمرار معاه، والنهارده يمكن فيه مؤتمر فى السعودية إحنا حنروح العسكريين الأردنيين.

الملك سعود عندنا معلومات كاملة عن إنه بيعت العربيات وبيبع بالطائرات - أمريكا بتساند - بيشتغل ببيعت فلوس. يعنى امبارح ببيعت للقبايل هناك، اللى بيحارب فعلا قوات سعودية وقوات أردنية، وهو فعلا حرك لوائين والانجليز ادوا الملك حسين أول امبارح طيارات طويلة المدى، هو مستمر دلوقتى.

من الجنوب فيه السلاطين بتوع اتحاد الجنوب، خصوصا سلطان بيحان.. بيشتغلوا وييساعدهم. ابن الحسن - اسمه الحسن - راح عدن وقعد مدة هناك، بتجبله برقيات مفتوحة على مكتب التلغراف وبتوع مكتب التلغراف اللى هناك بعنوا عنها هنا. الضابط اللى قام بالثورة اللى هو على علوان الملازم أول اللى هو عمل الثورة طلع بقوة ووقع وبيقولوا مات.

وبعدين الوضع هنا مايجيش، يعنى مايفيش حاجة خالص يعنى هو جيش قبائل ومفيش طيارات ولا حاجة، دلوقتى رايحة لهم شوية طيارات وطيارين من عندنا يشتغلوا معاهم. بعننا ناس هناك وبعننا قوة طيران هتوصل بعد يومين ثلاثة ولواء صاعقة وهنبت لواء تانى.

وبعدين الموضوع اللى قالقنى هو إن المعركة معركة فاصلة، فيه ناس يشبهونها بمعركة واترلو بين الملكيات والجمهوريات بعد الثورة الفرنسية.

فى نفس الوقت يعنى عندنا هنا خط الطيران ماشى، فيه تقريبا يعنى جسر جوى موجود يوميا بتشتغل فيه الطيارات الأنتنوف.. يعنى فيه طيارات تطلع وطيارات تنزل الأليوشن بتنتقل، ولكن برضه فيه سباق بالنسبة للحشد. طبعا إحنا فى ايدنا إن احنا حنوصل صنعاء، هنقدر نقفل المعابر من عند سعدا، وحنقدر يعنى الحقيقة بمواجهة حتى إن احنا يعنى بنكسر العدوان.

سرى للغاية

والحقيقة كان السؤال.. هل ملناش دعوة ولآ لينا دعوة؟ إحنا قلنا: لينا دعوة بمجرد ما أعلننا من أول يوم، وبعدين بمجرد ما أعلننا لينا دعوة ببلدنا الحقيقة وأى حاجة فى أيدينا نعملها. فيه مركب حتوصل النهارده وفيه مركب حتوصل بكره وفيه مركب حتوصل بعد بكره.. فيه أسطول؛ علشان قواتنا اللي هناك اذا حصل شئ فى صنعاء علشان نقدر فى أى وقت. المعركة مش سهلة المعركة صعبة جدا، ولكن اذا انتصر سعود وحسين فى هذه المعركة برضه هينقلوا المعركة بالنسبة لينا.

الحسن دخل أول امبارح، هم ظروفهم برضه صعبة جدا يعنى بين الحديدية وجدة حوالى ٩٠٠ كيلومتر، وبنعتبر من أجل هذا الانجليز وجدوا إن الملك حسين المدى بتاع الطيران اللي عنده وأعطوه الـ Hunter ١٥٠٠ كيلومتر.

من أول امبارح إحنا داخلين معارك على أساس صعدا، داخلين معارك بأقل الخسائر وماعدناش خسائر يعنى كثيرة.

وبعدين فى الداخل الأوضاع برضه البلد فوضى مافيش نظام، فيه مجلس ثورة ومجلس وزراء ومحدث بيعمل حاجة!

والحقيقة يعنى نجاح هذه الثورة معناها الحقيقة انهيار السعودية، وأيضا انهاء الاستعمار فى المحميات.

فى نفس الوقت إحنا اتصلنا بالانجليز أنا بعت لهم أول امبارح، على أساس إحنا مش عايزين.. ولحد دلوقتى هم خايفين وجود مصر هناك بيقلب الموقف الاستراتيجى فى المنطقة كلها. ومن المصلحة إنهم يعترفوا بالوضع فى اليمن ويمنعوا العدوان وإحنا بنسحب قواتنا، ولكن إحنا لا يمكن أن نقبل العدوان على ثورة اليمن.

فى نفس الوقت الروس بعد ما كانت العملية فيها نوع من الفتور يعنى، أما طلبنا منهم حاجات تجاوبوا معنا بسرعة.

وبرضه هى المشكلة اللي بتواجه الواحد، إن فى سياستنا كلهم بيخافوا إن احنا نعمل وحدة أو اتحاد، ومعنى هذا.. وحدة أو اتحاد الوضع الاستراتيجى بينقلب.

سرى للغاية

بالنسبة لنا أى وحدة أو اتحاد نتيجة حالة أو نتيجة ظرف طارئ، بعد كده بتتقلب علينا وبيبقى الموقف ضعيف والمشكلة أقوى بكثير من السابق.

قواتنا لغاية النهارده يعنى مانقدرش نقول إن هى كتيرة أو صغيرة، بكره يمكن أو النهارده بتوصل مركب، بعد بكره بتوصل مركب، بكره بيبقى عندنا لواء صاعقة زى ما قلنا. فى رأى إن المعركة هى معركة دفاع؛ أذاع عن القاهرة فى صنعاء لأن كل خطتهم كانت نقل المعركة الى الداخل.

المعلومات عن الموقف فى السعودية: الموقف فى السعودية تقريبا يعنى منهار ومهزوز! الموقف أيضا فى سوريا النهارده نتيجة اليمن فهو مهزوز، وهم احتاروا حيرة كبيرة جدا أول ما اعترفنا باليمن، طلعوا فى الصحف وقالوا: "انتهازية عبد الناصر"، وبيستغلوا موضوع اليمن! التانى بعد كده أما قال وزير خارجية اليمن: إن احنا ماحناش عاجزين، هم طلبوا الاتحاد - يعنى قيل الكلام ده بالشكل.. - وإحنا ما قبلناش. هوجمنا هجوم عنيف وقال: إن احنا رفضنا الاتحاد علشان مش عايزين نساعد الثورة!

بعد كده لقونا من غير اتحاد، وطلع إن احنا عندنا ٣٠٠٠ جنود مظلات هناك، والكلام ده طلع فى الجرايد، فاحتاروا تانى وقالوا: انتهازية واستغلال العملية.. الى آخره! الوضع سوريا، يعنى هم قفلوا جريدتين لحزب البعث، وبعدين النقابات هناك فى سوريا كلها وحدوية.. فقطعا الحكومة بتأخذ اجراء مضاد.

الى أى مدى حوصل فى عملية اليمن؟ اذا طلع طيران من جدة وضرب لازم نضرب طيران. فيه معلومات النهارده إن فيه طيران موجود وصل جدة، إحنا نقدر نضرب الطيران اللي موجود فى جدة؛ نضرب الطائرات نفسها بواسطة الـ fighters بتاعتنا، وتوصل وترجع تضرب الطائرات على أساس إن فيه عدوان.

برضه بعث للانجليز والأمريكان إن النهارده الثورة طالعة سببها تمشى، قلت لهم: حتكسب المعركة غصب عن كل القوى اللي حتقف ضدها، كونها هتطلع وتيجى المعركة معناها إن مصالحكوا هتنتهز وهتقولوا: إحنا المسؤولين! وفعلا كون الثورة تقابل العدوان وتنتصر عليه بيشرح جميع القوى التقدمية والقوى التحررية خصوصا فى عدن.

سرى للغاية

وطبعاً يعنى ممكن اذا قدرت تتصرف أسلحة من اليمن الى عدن، بيبقى الوضع فى المحميات.. اتحاد عدن اللي هم بيعملوه بيبقى فى المعركة. الكلام اللي احنا برضه متأكدين منه كمعلومات ١٠٠٪؛ الانجليز بيساعدوا على التدخل والأمريكان.

معلومات إن الملك حسين قال: إن الأمريكان مستعدين يساعدوا، الملك سعود بعث له وقاله: إن أنا روحت للأمريكان علشان يساعدوا مالفيتش عندهم كذا.. وايه الحكاية؟ ده كلام بقى قديم، ده ببيل على أن الأمريكان بيساعدوا.

الطيارات إحنا بعتنا هناك للسعودية على أساس إن الضباط الأحرار اللي فى السعودية - بعد ما توصل الطيارات - اذا وصلت طيارات من الأردن بيحاولوا يحرقوها أو يدمروها. معرفش هل حيقدرنا ولا لا؟

فى السعودية فيه ناس أحرار عندها، فيه يعنى زى ما العملية اللي كانت موجودة فى اليمن محدش كان يعرف المدى بتاعها هيبقى ايه.

الشغل النهارده بالطيارات، الحقيقة ميزة الطيارات اللي جات لنا.. الميزة بتاعتها حتى إن هم فقدوا تقتهم فى الطيران اللي عندهم.. القوة اللي عندهم.

بالنسبة مثلاً كون هل الانجليز يتعرضوا لنا على إننا نتدخل أو شئ من هذا القبيل، أنا أعتقد مش هيجصل إلا اذا طبعا قمنا بالعدوان عليهم يعنى ممكن يعملوا حملة علينا. ده الموقف بالنسبة لليمن.. أى استفسار؟

محي الدين: إحنا محددين دلوقتى الهدف اللي احنا بنشتغل عليه بالنسبة للقوات اللي هنتقلها، هل على أساس عدوان مباشر من السعودية والانجليز أو عدوان غير مباشر؟ غير مباشر يعنى هيسلحوا القبائل يعنى؟

عبد الناصر: هو عدوان.

محي الدين: غير واضحة الغير مباشر، يعنى هيسلحوا القبائل صورتها واضحة، انما العدوان المباشر معناه إنه حيش بجيش وحيش بطيارات.. قوة كبيرة يعنى.

سرى للغاية

عبد الناصر: هو عدوان غير مباشر من الانجليز وعدوان مباشر من السعودية، ولكن العساكر السعودية ملبسينهم يمن.

محي الدين: يمن؟!!

عبد الناصر: تعليمات سعود إنه لبسوا العساكر يمن، وحطوا للعربيات نمر لاتيني، أوعوكوا تتكشفوا أحسن عبد الناصر يعرف ويتدخل ضدنا ويضرنا! كده يعنى كلامهم. يعنى يبقى إحنا عندنا برضه المعلومات دى أكيدة ١٠٠٪. فهو سعود باعت وحسين بعت قوات، أول قوة وصلت ٦٠ ويعدين بعد كده بعت قوة تانية ١٦، وبعث أسلحة مضادة للطائرات وبعث هاونات وبعث المدافع المتوسطة وحاجات جت من الأردن.

محي الدين: يعنى غير مباشر للغاية دلوقتى.

عبد الناصر: الانجليز مش حيدوا لنا عدوان مباشر أبدا لكن حيزقوا السلاطين، ويروحوا لعند بعض القبائل وينضموا لهم. هم بيعتوا قوات من العدنية.. من قوات المحميات علشان تشتترك وجزء منها عربى؛ لأنهم فى عدن خافين جدا من العملية. سعود بيعمل ايه؟ ابتدى العملية كالاتى.. قال: ألم اليمنيين اللى الموجودين فى السعودية وأجندهم وأبعثهم، وعملوا مركز فى الطائف واشتغلوا على هذا الأساس. بعد كده قال: إنه بيبعت قوات من عنده من الحرس الأبيض، بيلبسهم يمنيين ويدخلوا على إنهم يمنيين.

بعد كده بعت لحسين وطلب منه قوات، ووصلت هذه القوات ودخلت أيضا لابسين يمنيين. ويعدين إحنا كل هذه العمليات يعنى عندنا امكانية إن احنا نطلع عليها ونشوفها، وبهذا نكون قريبين باستمرار ونقدر.

لكن سيل من العربيات فى جيزان يوميا باستمرار وطائرات باستمرار. بعتوا أول بنادق semi automatic أمريكانى - زى الشحنة اللى جات هنا - يظهر ماعرفوش يستخدموها فبعت ٣٠٠٠ بندقية للعرب أيضا اللى هم هناك فى بعض القبائل؛ على أساس إنهم ينضموا لهم وبيبعت فلوس.. امبارح بعت مليون ريال!

سرى للغاية

محي الدين: لا.. إحنا متصورين إن هو يتطور الى إنه الجيش السعودي - بالأسلحة الثقيلة اللي كانت عنده وبطياراته - حيش في معركة يعنى فى وقت من الأوقات، وإحنا مرتبين خطتنا على هذا الأساس.

عبد الناصر: الجيش السعودي عنده حوالى ١٢ طائرة، اذا ادوهم الأسلحة علشان يطلعوا، يعتبر إن ده هيكون بداية الثورة فى السعودية.

خطة الطيران - خطتنا - اذا تدخل الطيران السعودي واذا تدخل الطيران الأردنى لازم إحنا نضرب الطيران السعودي والطيران الأردنى مش نضرب السعودية. يعنى المطار اللي حيكون فيه الـ ٦ الطائرات الـ fighters السعودي اذا راحوا ضربوا صنعاء حنطلع نضرب الـ ٦ طائرات.. مش حنضرب البلد ولكن هنضرب الـ ٦ طائرات لأن هيبقى فيه عدوان يعنى. والخطة بتاعتنا يعنى هنروح مجلس الأمن ونعمل ونسوى وشئ من هذا القبيل، ولكن يعنى الطائرات اللي بتروح ممكن تروح عندك طائرات يمنى راحة تنتقم من الغارة اللي حصلت.

محي الدين: هم عندهم سلاح مدفعية وعندهم دبابات.

عامر: هو فيه قسمين.. قسم منه ضد تشجيع سعود للقبائل، والقسم الآخر بيقول ممكن يتدخل سعود مباشرة.

عبد الناصر: يعنى يتدخل سعود مباشرة جيش سعود موجود منهم ٢,٥٠٠، وموجود منهم جزء فى الرياض، وبعدين فيه جزء كبير برضه من الجيش ضباط أحرار، وبعدين الطريق مثلا امبارح يعنى الحنة اللي راحها جيزان ١٤ عربية غارزين فى السكة!

حسين: ده مين اللي طالبين؟

عبد الناصر: السعودية يعنى، وإحنا طبعا مطلعين على الاشارات وبنعرف العملية كلها، وفى كل عملية الاتصالات اللي بينهم موجودة لهذا بنبقى عارفين عملياتهم أول بأول؛ فمثلا الصبح النهارده طالبين كل العربيات بتاعة امبارح غارزة!

سرى للغاية

رفعت: طب إحنا يعنى نفس الحشود دى ما تضرب على أساس إنها موجهة ضد اليمن من داخل الأراضى السعودية.

عبد الناصر: هو ده الحقيقة إحنا اتكلمنا فيه.. اللي احنا عمالين نقول عنه، بس بطريقة غير مباشرة على أساس إن احنا لسه فى صعدا. أولاً مافيش جيش لليمن.. لا يعتمد عليه. الحقيقة كان فيه يعنى أخذ وعطا وبحث.. هل تضرب منطقة التجمع فى السعودية ولأ كان فكره إن اللي حصل ده ممكن يضربوا المطارات يعنى فى صنعاء وفى الحديدية ممكن، وبعدين اللي عايز يضرب يضرب. فيه كان اشارة أو فيه رسالة من الملك حسين للملك سعود بيقول له: إن أنا حبعت له الطيارات وتضرب الاذاعة فى صعدا وتضرب صنعاء. الملك سعود قال له: لأ.. لاحسن ده يعنى ما نعرفش لزمته ايه ويضربونا غلط وشئ من هذا القبيل، والمصريين يعنى يعتبروها ذريعة ويعملوا ويسووا.

أنا الحقيقة مقتنع أوى يعنى بضرب المنطقة، يعنى هى نقطة فى الصحراء وضرب هذه المنطقة ولو بس عمل ذعر، وحنركز فى العملية دى على أساس إنها ماتبقاش باينة ماتعملش غارة حتستخدم بقنابل زمنية كل ربع ساعة تنفجر قنبلة. فى وسط الهيصه اللي هناك بيبقى بيسبب ذعر طول النهار، فالعملية دى هتمشى. لكن أصل هى الحشود ايه؟ هى الحشود ادارية يعنى مش حشود، هو الحيز الادارى يعنى ذخيرة وكذا وأسلوب جديد يقوم من نجران وبعدين يقوم من نجران على جوه.

محي الدين: صعدا.

عبد الناصر: صعدا بتتضرب باستمرار.

رفعت: بس فى تقديرى.. يعنى طالما الانجليز بعنوا طيارات لحسين يعنى..

سرى للغاية

عبد الناصر: بعثوا طيارات لحسين، إحنا واخدينها على المحمل السئ على إن هم باعتين طيارات استثناء طويلة المدى كده، لكن قد يكون ده فى برنامج امداد حسين بالطيارات أو حسين خد هذه الفرصة إن يطلب طيارات والانجليز بعثوا له طيارات.

رفعت: لكن ماندلوش الفرصة إنه يستخدمهم يعنى.

عبد الناصر: آه.. هى الطيارات فى عمان.

عامر: يستخدمهم بجد.

عبد الناصر: وبعدين.. اذا راحوا جدة برضه منقدرش نضربهم.

عامر: إلا اذا.

عبد الناصر: إلا اذا هو ضرب.

عامر: بمجرد ما يوصلوا جدة، أول ما تطلع منه أى حاجة نقدر نتصرف على طول.

عبد الناصر: يعنى هو النهارده أى ضربة على جدة أو الرياض أو عمان طبعا بتسبب اشكال كبير، لكن اذا هم ضربوا من جده، وبنعمل على طول حملة كبيرة إنهم ضربوا وطلعت طيارات من جده وعملوا؛ لأن صنعا هنتضرب منين؟ ماهى يامن جدة يامن عدن.

صبرى: مافيش غير كده.

عبد الناصر: الانجليز مايقدرش فى رأى، يبقى التانيين اذا طلعت طيارات بقدر أضربهم.

سرى للغاية

رفعت: بالنسبة لمناطق الحشود بالذات يعنى.

صوت: مافيش حشود.

رفعت: نجران مثلاً.

عبد الناصر: ايه؟

رفعت: نجران؟

عبد الناصر: نجران يعنى من بكره..

البغدادى: هى عملية تخويف أكثر منها تأديب مش كده ولا ايه! تعطيل أكثر منها..

عبد الناصر: تعطيل.. يعنى الناس اللي هناك يطلعوا يجروا وهم يجروا وكده، والدنيا تتلخبط هناك.. هو ده..

حسين: هو الحقيقة موقف الطيران، الواحد يخشى أنهم يكون عندهم مبادأة ويروحوا بكام طائرة مقاتلة كويسة يكسروا الطيارتين اللي موجودين عند الثورة اليمنية. يعنى دى هى تبقى المعنويات بتاعت الثورة تعمل تأثير كبير، فهل ممكن نودى طيارات من هنا ولو عن طريق الخرطوم؟

عبد الناصر: يعنى؟

حسين: مش عارف أنا.

عبد الناصر: إحنا حنضرب بالطيران بتاعنا مش من اللي بيشتغل فى صنعاء.

سرى للغاية

حسين: يمكن الضرب بتاعهم ما يكونش مؤثر أوى نتيجة الكبر بتاعة..

عبد الناصر: لا.. يعنى الطيران بينزل ويطلع ويسوى وبيعمل كل حاجة، ولكن طبعا إحنا يوميا..

حسين: النقطة الثانية بتاعة..

عبد الناصر: بعدين طبعا هناك بنشتغل.. هم مافيش حد يعنى عملنا حاجات اللى اتعملت عملوها؛ فيه افنكر إنه كان ليهم طائرة عملوا فيها حمالات قنابل. الـ Yak اتصلحت دلوقتى ٨ طيارات والمفروض النهارده أول يوم ابتدوا يشتغلوا. وبعدين بعتنا لهم طيارتين Yak من هنا وحنبعت تانى.. ما عندهمش طيارات إلا الـ Yak وبعدين هم ما عندهمش طيارين، وبعدين بنبحث هل المطارات تنفع نبعت فيها حد ولا ماينفعش.

حسين: هى دى النقطة.

عبد الناصر: وبعدين هو إحنا بنقدر نصرب جدة من هنا، وبنقدر نصرب الرياض من هنا، بنقدر نصرب عمان من هنا، بنقدر نوصل جنوب صنعاء ونرجع من هنا.. الطيارات بتاعتنا. يعنى هو ده الحقيقة الموضوع اللى اتاخذ فى العملية، طبعا محدش متصور إنك تطلع غارات جوية من القاهرة الكل متصورين إن احنا من صنعاء.

عامر: لغاية دلوقتى محدش عرف.

عبد الناصر: ما حدش يعلم أبدا.

حسين: النقطة الثانية بتاعة اللواء الصاعقة.. يعنى لما نودى لواء تانى ما يأتشش على قواتنا هنا من ناحية قوات الصاعقة اللى عندنا؟

سرى للغاية

عامر: بيؤثر على قوة الصاعقة؟! قوة الصاعقة الوحيدة اللي عندنا..

حسين: أنا رأيى إن احنا نحط أكبر ثقل.. اللي أنا قلتة المرة اللي فاتت هنا إن احنا بنحط أكبر ثقل.. يعنى استراتيجيا بنحط أكبر ثقل فى المعركة.

عبد الناصر: يعنى ندخل وماننضريش!؟

حسين: لا.. لا.. مش كده.

عبد الناصر: أمال بس أنا رأيى فيه ناس تقول لك: ندخل بس..

حسين: لا.. لا.. لا.. مش كده.

عبد الناصر: اللي بنقدر نعمله بنعمله وإلا الحرج بيخلينا نتعطل وتبقى قواتنا صغيرة ويضربونا، هتبقى صورتنا..

حسين: أنا رأيى من أول لحظة..

محي الدين: متردد يعنى؟

حسين: لا.. لا.

السادات: هو سعود كده..

حسين: أنا من أول لحظة رأيى إن احنا بنحط أكبر ثقل ممكن فى المعركة، وده يعنى أنا لسه بكمل ويقول: يمكن ارسال أطقم كثيرة من هنا علشان الدبابات اللي هناك والسيارات المصفحة اذا كان فيه علشان تشغيلها بالكامل، ويكون الموضوع يدي ثقل برضه.

سرى للغاية

عامر: ده أحسن.

عبد الناصر: بس الدبابة هتنتقلها صعدا ازاي؟

حسين: لا.. معلش، على كل حال يعنى مش حيعرفوا ياخدوا صنعاء.. على الأقل مايعرفوش ياخدوا صنعاء نفسها. (ضحك)

عبد الناصر: إحنا كنا خايفين من تمن تركهم صنعاء، يعنى الملك سعود يروح يدفع له ٢ مليون ريال فى صنعاء، لغاية أول امبارح يبقى عندنا خوف من إن هو اللي بدل مايقعد يصرف على القبائل بيصرف على صنعاء، وبيحط ٢مليون ريال يخلص العملية! فى صنعاء سهل والدنيا فوضى؛ فكان الحقيقة الغرض تأمين صنعاء نفسها.. ده اللي حاصل دلوقتى.

عامر: وقلنا ده.

عبد الناصر: وكان الهدف التانى هو تأمين الطريق علشان يبقى لنا فيه ناس لمقابلة أسوأ الاحتمالات؛ حتى ما نسيبش ولادنا هناك يبقى عندنا مدمرات هناك وفيه مركب فاضية باستمرار معاهم قوة للحراسة. بعد كده بيبقى عندنا قوة تانية بنقدر نجمد بيها هجوم الشمال وهجوم الجنوب. بأعتقد إن العملية الوحيدة اللي بتبان هى عملية الصاعقة، وبرضه بنعتقد إن عملية الصاعقة مبتأثرش علينا هنا؛ لأنها مش هى قواتنا لأن القوة الضاربة هنا.

حسين: طبعا البديهي من الأول إن ما دام دخلنا فى العملية لازم نديها أكبر ثقل.. ده مش عايز مناقشة يعنى، والحقيقة هو ده اللي كان وإلا نيجى ننضرب علشان حاجة بسيطة ماينفعلش يعنى!

عامر: الموضوع هناك فى منتهى الصعوبة ووسائل المواصلات صعبة، والتانيين معهمش حاجة أبدا خالص صفر! منقدرش ندى قوة الصاعقة كبيرة..

سرى للغاية

حسين: لا.. ده هو ده الأصول.

عامر: موضوع قوات الصاعقة والكلام ده إحنا نقدر نستعوض ده.

حسين: آه.

عامر: يبقى إحنا ابتدينا نشكل لواء صاعقة، يعنى بنمشى فى العملية كلها.

حسين: موضوع فى السياسة برضه هم بيصرحوا دلوقتى.. العيني بيصرح هناك إن عدن لازم حتحرر، يعنى مافيش داعى للعملية دى دلوقتى..

عبد الناصر: قلنا له.

حسين: آه.. يعنى متهيالى مافيش مناسبة أبدا.. لازم نأمن جبهة الانجليز دى علشان..

عبد الناصر: هو قال: عدن لازم تتحرر، ولكنا لن نعتدى على عدن.

حسين: آه.. يعنى.

عبد الناصر: بعدين كان أصل محسن..

محي الدين: كان قعد هناك.

حسين: أنا عارف.. بتاع اتحاد العمال ما هو كان هنا باستمرار. يعنى هو موضوع تأمين الجبهة دى دلوقتى الى مدى كذا، يعنى مافيش داعى إنهم.. علشان الانجليز ما يخذوش action أجمد.

سرى للغاية

عبد الناصر: وضع الانجليز.. عارفين إن الدور على عدن سواء..

أصوات: (ضحك)

عبد الناصر: عدن النهارده فيها ثورة، وبعدين هو المشروع اللي بيعملوه الانجليز فى عدن اللي هو مشروع اتحاد..

حسين: اتحاد المحميات.

الشافعى: التحركات الانجليزية اللي فى الجنوب، هل بكثرة ولا بحجم؟

عبد الناصر: الانجليز بعثوا ٣٠ طائرة وسهل أوى ينقلوا فيها، ولكن فى رأى إن الانجليز لن يتورطوا فى ده دلوقتى أبدا.

الشافعى: وبالنسبة لاسرائيل مافيش يعنى أى تحركات بالنسبة لنا؟ يعنى تنتهز الفرصة فى الوقت اللي..

عبد الناصر: إحنا مستعدين لاسرائيل.

الشافعى: لا.. ما هو مفهوم، بس مافيش يعنى أى معلومات؟

عبد الناصر: إحنا حنستخدم هناك فى اليمن الصاعقة.

عامر: القوة الأساسية موجودة.

عبد الناصر: يعنى قوتنا هنا موجودة.

الشافعى: آه.. أنا بس كمعلومات يعنى.

سرى للغاية

عبد الناصر: هو قطعاً ممكن إنهم يشغلوا اسرائيل يعنى ده احتمال موجود.

الشافعى: علشان يخففوا يعنى.. آه.

عبد الناصر: بالضبط.. ولكن دفع اسرائيل حتى دلوقتى مع قرار الأمم المتحدة واسرائيل دلوقتى بتتكلم عن السلام، متهيألى مهواش..

الشافعى: مش بالطريقة..

عامر: اسرائيل فى حالة استعداد.

عبد الناصر: هم مش عارفين بقى.. اليهود مش عارفين إن احنا عندنا صواريخ ولا ما عندناش، وهم يعنى فوجئوا بعملية الصواريخ! إحنا كنا متصورين إنهم عارفين الحقيقة يعنى، وكنا متصورين طلوعوا الألمان فوجئوا وطلوعوا الروس فوجئوا!

صبرى: والأمريكان.

عبد الناصر: والأمريكان برضه فوجئوا، برضه إحنا كنا متصورين إنه الأمريكان عارفين لأن فيه واحد قال لهم وانتقبض عليه ومقالش حاجة، وبعدين فوجئوا بالعملية دى ما حدش عارف، وبعدين الجدع اللى هو اسمه ايه ده؟

صبرى: كروجر.

سرى للغاية

عبد الناصر: كروجر.. مشتري لنا، قبل ما نعلن قلنا: بنشون مواد خام لعدد كبير - حوالى ١٠٠٠ - قبل ما نعلن العملية الأخيرة؛ علشان اذا علموا علينا حظر بنمشى. فكروجر اشترى هو مواد خام حيروح يقول لهم: إنهم عندهم ١٥٠٠ اشترؤهم.

أصوات: (ضحك)

عبد الناصر: من سنة قبل التجربة يعنى.

الشافعى: آه.

عبد الناصر: يعنى قطعاً خيخضهم أكثر، ويعنى قطعاً حيديهم معلومات حترعهم أكثر، وبابن حتى فى تصريحاتهم..

السادات: فيه عصبية شديدة!

عبد الناصر: وبعدين إحنا النهارده بالنسبة للعملية إن احنا عندنا يعنى قوة خصوصاً من ناحية الطيران.

عامر: عندنا ٢٠٠ طائرة.

البغدادى: هو اللي بتصوره إن الانجليز بيحاولوا فى الجبهة الشرقية أن يشغلونا؛ على أساس تخفيف الضغط عن سعود وإن كان مباشر يعنى.

عبد الناصر: مع اسرائيل يعنى؟

البغدادى: مع اليمن يعنى.

سرى للغاية

السادات: ده بينقل على اليمن دلوقتى.

عبد الناصر: هو أصعب؛ لأن القبائل الشافعية وفيه ناس منها اتحركت وهو يعنى عمل مشاكل هناك.. واحد برضه جه ووصل..

السادات: وصل امبارح ياريس.

عبد الناصر: أنا قلت لأنور: إنه بيعته هناك ويحطوه فى المجلس وهو كان معاهم، ويظهر لما عملوا التشكيلات زعل، وهو اللي جه ده يبقى نسيب العينى.. محسن العينى. فهم قالوا: نضرب.. فالعملية مش ضرب ويس. وأنور بعت لهم وقال لهم: إن لازم يكون فيه مجلس رئاسة ومجلس الثورة وادو له الزاجل يعنى..

وبعدين الحقيقة الشغل فى السياسة لازم يمشى جنب الشغل بالقوة، فوصل امبارح.. متهيا لى وجوده ببساعد لأنه القبيلة الوحيدة فى الجنوب اللي كانت خارجة عليهم، لكن جميع القبائل الموجودة فى الجنوب..

صبرى: مأرب مش فى الشمال الشرقى؟

عبد الناصر: شرق صنعاء.

صبرى: شرق صنعاء؟ آه.

سرى للغاية

عبد الناصر: هو الجنوب كله شوافع، هي مأرب شوافع؟

السادات: لا.. مأرب زيدى.

عبد الناصر: مأرب زيدى.

السادات: آخر حدود الزيدى.

عبد الناصر: آه.

السادات: تحتها بقى الجزء من عندها لغاية المحميات شافعى كله.

عبد الناصر: النهارده قابل منكم واحد من..

السادات: من القبائل الجنوبية.

عبد الناصر: هي قبائل..

السادات: ما هي دى بتاعت سنان.

عبد الناصر: سنان.. هي دى الحقيقة اللي كانت تعباهم، وهي دلوقتى جزء منها الحقيقة مش كلها.

السادات: بالضبط.

سرى للغاية

عبد الناصر: وبعدين هو كون الانجليز حيحاولوا يدخلوا بحشد، وإحنا حنسد مدخل صنعاء لأن دى مأرب قريبة قوى من صنعاء، وفوق بنسد وبعدين بنعمل قواعد نشغل منها.

عامر: ابتدينا فى اتجاه سعدا، وبعدين فيه قواعد منقدرش نشغل منها؛ لأن الخوف من أن يستولوا على صنعاء ويسلموهم الحاجات ده..

عبد الناصر: على أساس آدى الحدود وآدى صنعاء؛ صعبة عليهم يعنى على الحدود وهى أصلا بتاعة سعود.. القبائل اللى هناك دى بتاعة سعود، آدى صنعاء - مأرب.

البغدادى: وبعدين بالنسبة للطيران هناك عدم منع..

عبد الناصر: بعتنا.

البغدادى: فلانم نخف إن أى زحف للمعركة من هناك.

عبد الناصر: هم بعنوا قسم فى المركب الأولانية وبعدين بعنوا ٧٠ طن والمركب الثانية.

البغدادى: هو لازم ينضربوا ضربة علشان يحسها سعود.

عبد الناصر: هو الحقيقة الضرب الواحد بيشتغل فيه على أساس تعطيل؛ لأن هو فيه مين بيبنى أكثر مين بيزق أكثر؟ لأن هو طالع صنعاء رايح على.. ولما حيجيله اللواء هو حيمشى، وإحنا عندنا معلومات أكيدة.

محي الدين: أنا فاهم إنه مش ضرب مباشر ده القاء قنابل، والقنبلة بعد ما حتمشى من الطيارة حتفجر.. ده اللى متصوره يعنى.

عبد الناصر: ازاي يعنى؟

محي الدين: يعنى مش حتيجي طائرة وتعمل dive عليه.

عبد الناصر: يعنى مش حتبقى rig.

محي الدين: مش حتبقى rig يعنى.

عبد الناصر: بعيدا عن المعدات وكل حاجة حيرمي القنابل وبيمشى، وبعد ما حيمشى حتبتدى تتفجر قنبلة قنبلة كل شوية.. ما حد عارف حد بيضره وما حد عارف. وبعدين أنا من رأيي بالنسبة لسعود يعنى اذا أعلن إن نجران انضريت أو حصل فيها كذا ببسبب دعر للحسن يرجع لأن الحسن مش راضى يدخل أبدا، وبيعت له يقول له: أدخل، والتانى يقول له: إن المصلحة إن أنا أقعد هنا أحسن، يعنى يبقى عامل زى الجدع أبو شنب ده بتاع ده..

السادات: بتاع المنيا. (ضحك)

عبد الناصر: لكن العملية يعنى أصلها هتطول وهتطول.

البغدادي: يعنى لو سعود اتخبط خبطة صغيرة كده برضه حيستمر ومعناه إن احنا نستمر، وبعدين سيبوه يجمع زى ما هو عايز، كل ما يجمع قوة وبعدين ينضرب ضربة تؤثر على السعودية نفسها.

عبد الناصر: ده أنا عايزه بينه وبين اليمن علشان يحميه.. ده اللي أنا عايزه يعنى.

أصوات: (ضحك)

سرى للغاية

محي الدين: ودول زى الجراد فى الانتشار، مش قاعدين جنب بعض كده فى كتل فى عمليات كبيرة زى الجيوش!

أصوات: (ضحك)

محي الدين: لا.. يعنى زى الجراد كده منتشرين، حد يعرف يطولهم دول؟! (ضحك)

البغدادى: لا.. هى المعركة فعلا معركة مكشوفة، وهناك بتبقى معركة..

عبد الناصر: لأ.. كون سعود دلوقتى والملك حسين بعنوا..

عامر: صعدا، بنعمل عمليات زعر.. يعنى غارات لبث الذعر.

عبد الناصر: هو أنا رأيى إن عملية المدفعية والمدركات صعبة إن احنا ندخل بها.. صعب.

السادات: الطرق.

حسين: هو الهاونات كفاية أوى يعنى.

عبد الناصر: يعنى صاعقة.

محي الدين: الحقيقة أخطر حاجة بقى خايف منها إن شوية الطيارات اللى هناك فجأة يروحوا مضروبين؛ هى دى يعنى العملية اللى.. المعنويات بتاعت الناس!

صبرى: أصل الرد حيبقى على جدة..

سرى للغاية

عبد الناصر: ايه؟

صبرى: وده ببقى التأثير المعنوى أكبر كمان.

حسين: يعنى عملية لا رحمة فيها دى.

عبد الناصر: اذا ضربوا صنعاء لازم أضرب جامد.

حسين: آه.

عبد الناصر: اذا ماضريتش المدينة لازم تضرب الطيران.

حسين: آه.

عبد الناصر: ونروح فى الرياض حتى نعمل حرب عصابات.. إحنا من دلوقتى نروح الرياض ومن دلوقتى نبعث وننزل على الحدود.. (ضحك)

أصوات: (ضحك)

عبد الناصر: علشان يفكر ١٠٠ مرة قبل ما ياخذ القرار.

عامر: مادام هو مالوش دعوة مين نازل ومين..

سرى للغاية

عبد الناصر: لا عنده رادار ولا عنده أى حاجة!

عامر: ما يقدرش يمسكها يعنى.

عبد الناصر: نبعث له كده طائرات تروح فوق قصر الناصرية وتنزله يعنى ٣.. كده تنور..

السادات: (ضحك)

عبد الناصر: ويمشى.. معناه إن احنا نقدر. الحقيقة برضه من الجوابات قال: لأ.. بلاش نعمل ده لاحسن عبد الناصر قال: إن اللي حتدخل حيتدخل، وبعدين مع حد تانى قال: ده عبد الناصر قال اذا حد ضرب هيتدخل.

حسين: هو حسين هو اللي عدوانى أكثر..

السادات: مجنون!

عبد الناصر: مع وضع احتمال إن عندنا لواء المظلات، كتيبة المظلات نستطيع إن احنا نستخدمها من هنا فى أى ميدان، الطائرات تروح وتنزلهم وترجع.

محي الدين: هو من ناحية التأمين الداخلى للثورة، الثورة طبعا تقدمية والقبائل رجعية، استمرار اعتماد الثورة على الناحية القبلية يعنى مش ممكن؛ لأن فى يوم من الأيام حتتقلب عليهم هذه القبائل - شوافع وزيدية - واذا ماكانوش يلحقوا بينوا قوة ذاتية للجيش للتدريب.. مركز تدريب يعنى يعمل قوة ذاتية علشان كمان إحنا نخلص فى المستقبل.. كمان يعنى متورطين.

سرى للغاية

عامر: بدأنا وهنجيب منهم ناس هنا للتدريب.

محي الدين: لا.. معاك يعنى.

ابراهيم: لو نقدر نجيب منهم ولاد على رأى عامر.

عامر: ولا حنتتهى العملية دى خالص.

السادات: حتزداد قوتنا، إنت عارف على بيعمل ايه هناك؟

ابراهيم: ونقدر نجيب منهم ولاد هنا يتمرنوا كمان.

عبد الناصر: هو الجدع اللى كنا معتمدين عليه فى العمليات كلها الحقيقة هو جدع جريء.. يعنى هو لسه جاى النهارده الصبح، وبعدين طلع ولما لقي معبر هو اللى خد العملية وخذ القوات وتته طالع ووقع..

السادات: عبد المغنى.. على عبد المغنى.. ملازم.

عبد الناصر: بعدين طبعا فى صراع داخلى فيه جبهتين هناك، فيه البيضانى ومعاه ناس، وفيه الجبهة الثانية بتاعت محسن العينى برضه ومعاه ناس، وبعدين فيه السلال وبعدين فيه تانى. ولكن إحنا الحقيقة هناك لنا الكلمة الأولى يعنى، ولكن الحقيقة الثورة يمكن من غيرنا كانت وقعت.

السادات: آه.. ماكانتش تستنى.. كان مستحيل.

عبد الناصر: وماعندهمش جيش، يظهر هم العملية اللى عملوها مش فى المدرسة اللى عملها على عبد المغنى، لكن أنا بعترر الفايده اللى احنا استفدناها..

سرى للغاية

محي الدين: من الناحية العربية.. كل المنطقة العربية.

عبد الناصر: العربية والعالمية.

رفعت: فيه نقطة بالنسبة للاعترافات بتاعت الدول، أنا ملاحظ إن الدول الافريقية بالذات متباطئة.

عبد الناصر: هو إحنا امبارح..

صبرى: أيوه.

عبد الناصر: بمالى.

صبرى: بمالى وغانا وغينيا.

عبد الناصر: إحنا لينا علاقة معاهم بقية الدول.

عامر: هم دول.

السادات: ومالى.

رفعت: اندونيسيا.

رفعت: معرفش الهند بقى.

عبد الناصر: لأ.. الهند لسه. يعنى هم الجزائر اعترفوا، كل العرب تقريبا اعترفوا.

سرى للغاية

حسين: حسن بقى؟ طبعا طبعا.. مستحيل مستحيل. (ضحك)

عبد الناصر: مين؟

صبرى: العوينى.. هو عامل دلوقتى زى السودان؛ يعنى فى حاله خالص.

عبد الناصر: يعنى هو ما بيدخلش فى مشاكل.

صبرى: فى حاله خالص يعنى.

عبد الناصر: أنا بعتر إن المعركة هى معركتنا بينا وبين الرجعية، مش بين السلال.. السلال راجل مالوش دعوة..
قاعد فى المكتب ويقول لك: أنا ماليش دعوة! (ضحك)

أصوات: (ضحك)

عبد الناصر: والله! بعنوا اشارة وقال له: عايزين مدفعية ومدمرات وطيران.

السادات: وجيش ودولة! (ضحك)

أصوات: (ضحك)

الشرباصى: يمكن مواصلة الضغط على الأمريكان يفيد.

عبد الناصر: هى العملية قطعاً يعنى مبدئياً حتدخل فى مليون جنيهه يعنى بالنسبة للجيش.

سرى للغاية

الشافعى: وايه مليون جنيه يعنى؟

عبد الناصر: ولكن أنا فى رأى العملية اللى حصلت فى اليمن تساوى أكثر من ٢٠ مليون جنيه.

الشافعى: طبعا.

طراف: طب التمويل؟

عبد الناصر: نعم؟

طراف: التمويل اللى حيمشى فى البحر الأحمر، مافيش احتمال اعتداء عليه من غير جده مثلا؟ المراكب يعنى اللى حتحمى التمويل.

عبد الناصر: مأظنش.. يعنى اذا حصل اعتداء من جدة..

صبرى: يبقى اعتداء علينا.

عبد الناصر: مين هم؟

طراف: من الأردن أقرب على البحر الأحمر.. مش عارف!

عبد الناصر: ما عندهم حاجة.

طراف: واخدين طيارات دلوقتى.

سرى للغاية

عبد الناصر: لا.. يعنى الطيارات اللى عندهم يعنى علشان توصل وتقوم من عمان وترجع، يبقى بتأخذ مسافة رايح جاى يعنى ١٦٠٠.

طراف: لا.. ما أقصدش طريق من السويس على البحر الأحمر، من السويس فى طريقها.

عامر: نمسكهم إحنا.

طراف: معلىش.. لا يعنى..

عبد الناصر: عندنا معلومات.

طراف: تموين ماشى وفوقه طيارات، يعنى مراكب ماشية وفوقها طيارات.

عبد الناصر: يعنى علشان الطيارات يعرف لازم يكون عنده معلومات، الحقيقة يجب إن المعلومات مابتطلعش من السويس إن المراكب طالعة.

عامر: مفيش خوف.

السادات: جماعات تخريب يعنى؟

البغدادى: يقول لك المدمرة هناك ويحط لها حاجة يعنى.

عبد الناصر: لا.

حسين: هو الدفاع عن الحقيقة الحقيقية - وخصوصا الجوى - يعنى موضوع فى غاية الأهمية.

سرى للغاية

عبد الناصر: الدفاع الجوى أساسا لأن الطائرات الـ Yak!

أصوات: (ضحك)

عبد الناصر: طبعا المدمرات اللي هتروح دى هيكون عندها رادار.

حسين: وعندها مدافعها.

صبرى: مايلحش يشوف الطائرة..

عبد الناصر: ايه؟

صبرى: الرادار بتاع المركب مايلحش يشوف الطائرة من بعد، حيحس بيها فوق على طول.

عبد الناصر: فيه حاجة؟

صبرى: المجلس التنفيذى عقد جلستين..

عامر: المجلس بحث عقب التدخل السعودى..

عبد الناصر: آه.. من الممكن على يقول: إننا بحثنا موقف اليمن والاعتداء السعودى، والاعتداءات اللي موجهة برضه. وإن الجمهورية بجانب اليمن ستقف لمقاومة كل اعتداء.. مش كده؟ يعنى لازم، هو حسين قال امبارح: كل قواتنا بجانب اليمن، لكن برضه نبرز حشود السعودية.. العدوان السعودى - الأردنى على اليمن.

سرى للغاية

صبرى: المجلس التنفيذى عقد جليستين، وكلا الجليستين الحقيقة مكانش فيه جدول أعمال..

الجلسة الأولى.. كانت مخصصة لشرح التنظيم وتنظيم مجلس الرئاسة وتنظيم اللجان المختلفة اللى هتشكل فى مجلس الرئاسة، والمكاتب الفنية اللى هتعمل مع المجلس التنفيذى ومجلس الرئاسة. ولكن أثرت مع الاخوان الوزراء أساسا فى أول جلسة موضوع الأداة الحكومية كأداة تنفيذية يجب أن تؤدى واجبها.

واتجه النقاش الى أن الحكومة بوضعها أو الجهاز التنفيذى بوضعه الحالى ماهواش فى الصورة الماضية بتاعة الحكومة، بل هو فى الحقيقة فى الدولة الاشتراكية بيدير، وبيدير انتاج وبيدير أعمال من جهة، ومن ناحية ثانية جزء منه بيؤدى الخدمات، وفى كلتا الحالتين يجب أن يعمل بكفاءة عالية.

ففى قطاع الانتاج - وأساسا بالنسبة للوزارات اللى بتعمل تحتها مؤسسات - يجب أن يعمل هذا الجهاز بعقلية ادارة الأعمال. وفى قطاع الخدمات يجب أن يعمل على أساس إنه خدمة الجماهير بأحسن كفاءة وبأسرع وقت ممكن.

ثم اتفقنا على أن كل الوزراء هيتقدموا فى خلال ١٥ يوم - كل فى ما يخص وزارته - بالاقترحات التى تتماشى مع تغيير اللوائح المعمول بها فى هذه الوزارات لتأدية الهدف ده. وقلنا: إن احنا نفصل ما بين تنظيم الأداة الحكومية اللى ببيحث مركزيا كتتنظيم عام، وتغيير القوانين اللى اللجان حاليا بتدرسه؛ لأن ده هياخد وقت طويل. مانستناش هذا الوقت، انما نقدر نبتدى من دلوقتى نشوف الحاجات الفرعية اللى سواء كانت فى سلطة المجلس التنفيذى تعديلها تعدل، أو اذا كانت حتى تستدعى قرارات أو قوانين ممكن إن احنا نعرضها على مجلس الرئاسة لاقرارها ولتنفيذها، لغاية ما تتم اللجان المختلفة اللى أعتقد أنها هتكون مستديمة فى الواقع - سواء كانت فى الجهاز المركزى أو فى تعديل القوانين - فى أعمالها هتتعد مدة طويلة.

فى الجلسة الثانية.. أثرت مع السادة الوزراء بعض الاقتراحات.. أو الاقتراحات اللى أثرت:

أولا: فى مجلس الرئاسة الأسبوع الماضى؛ الخاصة بأن الوزراء لازم يفتحوا بابهم للجماهير ويحددوا أوقات معينة للعمل لمقابلة الجماهير. فدار نقاش طويل الحقيقة، وكان رأيهم إن تحديد حتى ساعتين أو ثلاثة فى حد ذاته مش عملى لأن مش هيقدرنا يقابلوا كل الناس، ولكن ممكن أوى إن كل واحد - كتوجيه عام - أى واحد يطلب منه مقابله لسبب جدى إنه يقبله، ومش ضرورى فى أثناء الساعات المخصصة بل فى أى وقت من أوقات النهار وفى خلال الأسبوع.

سرى للغاية

ولكن ممكن إن احنا برضه كطريقة عمل إن احنا بنعمل - غير مكتب الشكاوى - مكتب للشئون العامة التابع للوزير مباشرة. وهذا المكتب يتلقى الشكاوى الخاصة بالوزارة بتاعته؛ يعنى الشكاوى اللى خاصة بسوء الادارة أو بتعطيل الأعمال فى الوزارة من أى واحد بيقدر يروح لهذا المكتب وبيقدم الشكوى، ويجب أن يطلع عليها الوزير ويشوف يتعمل فيها ايه؟ كذلك اتفق على إن بيحصل تفتيش مفاجئ على جميع أقسام الوزارة بواسطة الوزراء وبدون اعلان، ثم مرور فى الأقاليم - وخاصة بالنسبة للوزارات التى لها أفرع فى الأقاليم ومحتكة بالجماهير فى الأقاليم - وكل واحد هيعمل برنامج خاص له أو لمجموعة حتى تقوم مع بعض للمرور فى الأقاليم.

وبعدين ناقشنا محصول القطن، وكان عقب اعلان وزير الزراعة التقدير الأول.. والتقدير الحقيقية طلع ٩,٦٠٠,٠٠٠ قنطار بمتوسط ٥,٨٢٪.

عبد الناصر: قنطار مترى؟

صبرى: قنطار مترى بمعدل ٥,٨٢ مترى للفدان، وبالمقارنة مع السنين الخمسة اللى فاتت دى أعلى نسبة وصل اليها انتاج الفدان الحقيقية فى أى سنة من السنين، وأعلى محصول ماعدا سنة ٣٧.. من أول سنة ٣٧ أكبر محصول. وكان فيه فكرة إنه مانعلنش عن ٩,٦٠٠,٠٠٠ قنطار؛ علشان مايقاش معروف إن عندنا معروض كبير وقد يؤثر على حصيلة النقد الحر. ولكن اتفقنا على إن بنعلن برضه المحصول على حقيقته؛ لأنه المحالج بتطلع احصائيات وهيتعرف، وتجار الداخل وكل دول هيتكلموا ومش هيقدرنا يصدقوا أن اعلاننا لو خفضنا إنه هيتعرف فى السوق. واتفقنا على إن وزير الاقتصاد بيطلع..

عبد الناصر: هيعرفوا وبعدين إحنا عاوزينهم فى اليومين دول. (ضحك)

صبرى: ده فيه قانون.. ده فيه قانون.

سرى للغاية

ابراهيم: لأ.. أصله ما حصلش يعنى.

الشرباصى: فيه قانون يعنى مش كده؟

صبرى: آه.

الشرباصى: أصل فيه قانون ماشيين عليه، فيعنى كونا مانعلنش يعنى ببقى..

صبرى: لأ.. نعلن الـ ٨ مليون بدل الـ ٩ مليون.

الشرباصى: وبعدين برضه بكره يطلع فى وزارة الاقتصاد يقولوا علينا برضه ما حدش يثق!

صبرى: بس اتفقنا على إن وزير الاقتصاد بيطلع تصريح تانى يوم، ويقول: إنه نظرا لأن استهلكنا المخزون فى السنة اللى فاتت هنزود الكمية اللى محتاجين له محليا الى ٤,١٠٠,٠٠٠ قنطار مترى؛ وبالتالي ببقى بقينا فى حدود الـ ٥,٥٠٠,٠٠٠ اللى هى كانت مقدرة للتصدير.

البغدادى: كان مقدر ٥,٥٠٠,٠٠٠ وكان حتى ٣,١٠٠,٠٠٠.

صبرى: آه.

البغدادى: فدلوقتى زودنا.

صبرى: زودنا مليون.

البغدادى: ليتناسب محصولنا الى مليون.

سرى للغاية

صبرى: اللى هو مليون اللى هو استهلكناه السنة اللى فانت. هو فى خلال السنة بنقدر طبعا بنزود لو جت طلبات، بعدين الحقيقة وزير الزراعة بناءا عليه اقترح أنه تعطى مكافآت للناس اللى اشتغلوا فى عملية المقاومة والاشراف - اللى اشتغلوا فى المجال يعنى - وكذلك الموظفين أو العمال اللى فى الوزارة نفسها، اللى كان عمليتهم مرتبطة بعملية الخطة بتاعة مقاومة الدودة.

حسين: آه.. إحنا بس هو القرار النهائى اللى كان مع..

صبرى: آه.. طبعا أنا هقدم مشروع قرار للمجلس للفئات المطلوبة للموظفين والعمال، وبعدين الحقيقة ظهرت ظاهرة غريبة لما شطنا تفاصيل الاحصاء؛ إنه فى بعض المحافظات كان المحصول مرتفع جدا، وبعدين فيه محافظة أو اتنين منخفض جدا، يمكن أقل من متوسطات السنين اللى فانت كمان؛ اللى هى سوهاج وبعض المراكز فى قنا! وأعلى محصول كان فى الغربية المتوسط وصل الى ٧ قناطر فى المتوسط.

الشافعى: منوفى؟

صبرى: آه.. منوفى وجيزة ٤٥. ولكن برضه اللجنة لما كانت بتبحث التقدير مريضيتش تاخذ ب ٧ نزلته ل ٦ برضه زيادة فى الحيطه، ولو أن الشواهد بتدل على ٧. فطلبت الحقيقة من لجنة الزراعة والرى بأن تدرس الظاهرة بتاعة زيادة المحصول عموما وانخفاضه فى مناطق سوهاج وقنا، وايه الأسباب التى أدت الى هذا؛ بس دراسة دقيقة ولو أنه كان عندنا معلومات طبعا أولية عن الأسباب اللى هى: إن الناس مانفذتش فعلا الخطة وحصل مقاومة لتنفيذ الخطة. وده يدل فعلا أن خطة المقاومة السنة دى كانت سليمة، والأجهزة اللى أشرفت عليها كانت بكفاءة الحقيقة، وتدل على أننا ممكن أوى إن احنا نتوسع رأسيا فى الانتاج لو كان المشرفين والخطط بتوضع مسبقا، وبتنسق مع الوزارات المختلفة بدون حتى ما نزود التسميد والصرف زى ما كان محطوط فى الخطة.

سرى للغاية

بعد كده أثيرت مناقشة عن متابعة الخطة؛ لأن كنت طالب إن احنا نبتدى نشوف تقرير المتابعة بتاعة الـ ٣ أشهر الأولى فى أول نوفمبر، وجدنا إنه مش هيكون ممكن فى أول نوفمبر، يمكن ١٠ نوفمبر نتقدم بالتقرير عن متابعة الـ ٣ أشهر الأولى من الخطة. ده يعنى ملخص المناقشات اللي دارت فى المجلس التنفيذى فى الجلستين اللي فاتوا.

الشافعى: بالنسبة لموضوع التمويل بتاع القطن، ففيه بعض الناس قدمت شكاوى بأن التمويل مش متيسر!

صبرى: أيوم يافندم.. هو الحقيقة مانوقش فى المجلس التنفيذى، يعنى أنا حبيت بسرعة أعقد جلسة خاصة مع وزير الاقتصاد ووزير الزراعة علشان أحل المشكلة. هو كان فيه توقف فى تمويل بنك التسليف، كان له ١٥ مليون جنيه للتمويل فماكانش حصل عليهم. وبعدين حتى اتفقت مع زندو؛ على أنه كان بيعت لأنه كانت جت أخبار برضه إن الفرازين جداد لسه وكلهم مصريين. كان زمان كلهم أجنب والسنة دى كلهم جداد؛ فقلبهم مش جامد فى تقدير الرتب.. بيخفوسوا شوية الرتبة. وكان بالتالى الفلاحين بتحجم عن البيع، فنزل أتيام من لجنة القطن بخبراء من الاسكندرية فى بعض المحافظات وهينتشروا فى جميع المحافظات علشان يدفعوا بعملية سير التجارة بتاعة القطن، وفى خلال أسبوع هيمشى.

حسين: الكلام ده اتقال السنة اللي فاتت ونفس اللي بيحصل السنة دى حصل السنة اللي فاتت! وده اللي كان خلانى فى الصيف أحاول أشوف موضوع تسويق القطن، وبعدين زهقت منه وقلت: وزارة الاقتصاد تتولى العملية، ماعدا محافظة المنوفية ومحافظة البحيرة بيتعمل فيها تسويق تعاونى. لكن السنة اللي فاتت حصل نفس الشكوى بتاعة إن الناس مش لاقيين حد يشتري القطن.. يعنى المحافظات.

عبد الناصر: يعنى لازم إن احنا الحقيقة نعمل هذا الاجتماع يعنى.. مش كده ولا لأ؟

سرى للغاية

حسين: أيوه صح.. ما علشان كده أنا باقول يعنى: إن الموضوع مش موضوع الفرازين بس، الموضوع إن التجار ما بيشتروش القطن!

عبد الناصر: لغاية ما يخفضوا.

الشافعى: لغاية ما يخفضوا فى الأسعار.

صبرى: وحصل حاجتين الحقيقة وظاهرتين السنة دى؛ هو فيه طبعا السنة دى شوية قلقلة لأن احنا ننتقل الى نظام التسويق التعاونى، وفيه بعض المناطق غير مؤمنة أو صعب اقناعها؛ وخصوصا فى المناطق اللى الجمعيات التعاونية فيها ما عندهاش ثقة الفلاح، وبعدين فيه مناطق تانية أو فيه محافظة بحالها فى المنوفية عملت تسويق ومرتاحين جدا.

عبد الناصر: النهارده التسويق التعاونى فى الاذاعة.

صبرى: هناخد من جميع المحافظات مندوبين عن الجمعيات التعاونية - وخصوصا من سوهاج - وهنوديهم للمنوفية يزوروا ويشوفوا العملية.

عبد الناصر: فيه نقطة هنا الجمعيات التعاونية هنا يعنى فيها اقطاع! اذا كانت الجمعية فيها اقطاع الحقيقة الناس متقدرش تتعامل معاها؛ لأن هو ايه سبب انخفاض القطن؟ إن البلد منقسمة على بعض، واللى ماسك الجمعيات التعاونية ناس اقطاعيين، يعنى بياخدوا هم كل حاجة وما بيدوش التانيين!

سرى للغاية

حسين: لا.. هو اللي حصل ياريس فى الصيف..

عبد الناصر: اللي حصل معاكم!

حسين: أنا متتبع الموضوع وكلفت المحافظ قام شافه بنفسه وحصل رفت ٣٠ واحد؛ العمد كانوا بيقاوموا العملية لأن الناس مابتعملش مقاومة بالمبيدات، وأظن كلمت زكريا.

محي الدين: حصل حادث وأخذ وأوقف شيخ البلد..

حسين: مشايخ بلد أو عمد أو حاجة.

عبد الناصر: هي الجمعيات أساسا..

صبرى: فيه صراع.

عبد الناصر: الناس ترفض التعاون لأسباب جدية قدام عينها؛ شايف إن فيه ناس ماسكة التعاون وناس بتستفيد منه، لكن اللي مشى فيها التعاون يعنى هي المنوفية..

صبرى: هي المنوفية.

حسين: إحنا اخترنا المنوفية والبحيرة مخصوص علشان تجربة عملية التسويق التعاوني، والمحافظين عندهم استعداد، والناس عندهم استعداد.

هو النقطة الثانية والله بمناسبة المكافآت: هو فيه نظام للمكافآت معمول كان برضه اتكلفت زمان علشان مشروع للنياشين.

صبرى: أيوه.

سرى للغاية

حسين: الدكتور حشاد..

صبرى: هو هيعمله ويقدمه لى.

حسين: يتعمل لأول مرة، أظن بتبقى كويسة أوى عمليا إنهم ياخدوا نياشين أو حاجة.. الناس الكويسين.

عبد الناصر: ومكافآت تذكارية.

صبرى: مكافآت للمحافظة نفسها..

حسين: وكاسات.. معمول.

صبرى: وكاسات وحاجات للمحافظة كمحافظة. هو فيه برضه متهيألى من الانصاف إنه عملية التعاون، ومشيتها فى المنوفية وفى بعض المناطق بترجع برضه الى المحافظ وشخصيته.. يعنى لما يكون محافظ مصمم يعنى.

عامر: وفاهم.

صبرى: وفاهم طبعا بيمشيها، ولذلك برضه متهيألى ندى مكافأة أو حاجة تشجيعية للمحافظ.. نيشان يعنى.

عبد الناصر: لا.. هو إحنا قررنا التعاون كتجربة وقلنا فى المنوفية..

حسين: هو تقريرنا الحقيقة للعملية دى بناء على احتمالات النجاح فى المديريتين دول، هم اللى طلعا.

سرى للغاية

عبد الناصر: أصل هم كل العمد تطبق التعاون؛ فيه انتين طلعا كويسين فين الباقي؟! لكن زى ماقلنا الاتنين دول بس تعاون.

حسين: يبقى شكر كفاية.

الشافعى: هل التمويل كافي علشان يمول العملية من بنك التسليف؟

صبرى: لا.. هي البنوك التجارية بتمول برضه، يعنى فيه ٨٢ مليون جنيه منهم ١٥ مليون لبنك التسليف، والبنوك التجارية برضه بتمول.. يعنى ماشية عمليات التمويل.

عبد الناصر: وبعدين التمويل مفتوح.

صبرى: مفتوح خالص ومالهوش حدود. هو فيه لغاية دلوقتى بالفعل فى ايد البنوك كلها ٨٢ مليون جنيه. هو فيه ظاهرة تانية برضه أثرت - ويمكن دى برضه هنتلافاها السنة الجاية - إن بعض التجار اشتروا فى الأول غالى من الفلاحين، على أمل إنهم كانوا يبيعوا للمصانع رأسا يعنى يتعاقدوا مع المصانع، وكانوا يبيعوا فى الرتب يعنى بيعوا الرتبة على المصنع، والمصنع ما عندوش مانع إنه يعلى الرتبة ما هو بيكسب، وكانت العملية ماشية على هذا الأساس.

وبعدين عزيز صدقى طلب إن هذه العملية تبطل نهائيا؛ لأنه فيها لعب وفيها corruption ما حدش يعرف يمسه أبدا. وقد يحصل corruption ما بين التاجر وبين الرجل اللى بيتعاقد معاه فى المصنع، ما حدش عارف يطلع له رتبة تمن ولا نص ما حد عارف! فهو قرر الحقيقة بالنسبة للمصانع وادى تعليمات إنه ما يشتروا إلا الرتبة الحقيقية وبلجنة تحكيم؛ وبالتالي التجار خسروا فى العملية دى فكشوا شوية من السوق برضه، ودى وقفت شوية السوق.

رفعت: بقتراح يعنى بجانب المكافآت التشجيعية إنه ينعم على بعض الناس بالنياشين.. اللى بينتجوا أو اللى يبقاوموا.

سرى للغاية

حسين: هو فيه ليهم جوايز .. اللى بينتجوا ليهم جوايز وما فيش مانع ياخدوا المنتجين نفسهم ..

عبد الناصر: مثلا فى كل محافظة ممكن نديله.

حسين: والحقيقة أنا كنت قلت للدكتور حشاد: علشان اذا كان الناس نجحوا - الموظفين - لو نقدر ندخلهم فى عملية الانتاج؛ بحيث إن هو مشرف على الجمعية التعاونية يبقى ياخذ دور المنتج شوية، بحيث إن أى زيادة فى الانتاج عن مستوى معين يقدر ياخذ نصيب فى الربح. وده يبقى سهل الراجل المنتج.. الفلاح لما يجيله ربح زيادة عن المتوسط بمقدار أد كده مش هايهمه إنه يدى ٥% أو ٢% أو ١% زى ما بنتحسب.

عبد الناصر: ١% فى ايه؟

حسين: ١% من الزيادة فى الربح.

عبد الناصر: هايقول لك: أنا خسران! (ضحك)

أصوات: (ضحك)

حسين: لا.. مايقدرش الواحد يقول إنه خسران. والله النظرية دى لو قدرت أخلى المشرفين الزراعيين ليهم نصيب - ولو ضئيل - أى نسبة فى زيادة الانتاج اللى تحصل؛ يعنى عملية والله تخليهم يشتغلوا بدينهم.

الشافعى: بحيث مايحسش الفلاح إنها متاخدة منه.

حسين: صح تعملها ضريبة وتاخذها يعنى.

سرى للغاية

رفعت: لى اقتراح بالنسبة حتى للنياشين بيقى لها ميزات عينية يعنى.

حسين: لا.. بياخدوا، فيه نظام للجوايز ليهم موجود.

صبرى: يقصد مثلا تعليم مجانا.. ياخذ تعليم مجانا لابنه مثلا، ما هو التعليم كله مجانا! (ضحك)

عبد الناصر: ممكن نديهم يعلموا ولادهم مجانا! (ضحك)

أصوات: (ضحك)

حسين: ما هو بياخدوا ١٠٠ جنيه وحاجات من دى بياخدوا فلوس.

عبد الناصر: يعنى هو عادة بيبقى فيها نيشان واحد فى كل الدول اللى هو..

صوت: هو بطل الاتحاد السوفيتى بيكون له..

ابراهيم: ياخذ معاش لأنه حاصل على هذا النيشان..

حسين: يعنى حاجة أدبية.

صبرى: معنوية.

ابراهيم: وبالتالي الواحد يسعى لأن يحصل عليه.

صبرى: وبيطلع الأول فى الدكتوراه بتاعته.

سرى للغاية

عبد الناصر: يعنى بيقى ليه الحق إنه يطلب مقابلة نائب رئيس الجمهورية! (ضحك)

أصوات: (ضحك)

عبد الناصر: بيقى خلاص اللي ياخد نيشان يكون له الحق إنه.. (ضحك)

أصوات: (ضحك)

عبد الناصر: هو أصلا نظام النياشين كلها عايز اعادة فرز، وممكن لجنة من عندنا تبحث لنا مين من الناس اللي نشيل عنها النياشين القديمة، وعقبال مانجيب لجنة لغاية دلوقتى بنعمل نياشين. وباريت لجنة تطبيق الميثاق تشوف النياشين اللي عندنا، وتشوف الدول الثانية.. الدول الاشتراكية بتدى.. بطل الاتحاد السوفيتى.

الشافعى: آه.

عبد الناصر: وممكن ياخدها بتاع لينين مثلا.

صبرى: آه.

عبد الناصر: يعنى الحقيقة إحنا عايزين حاجتين نشوفهم.. اللبس الرسمى لسفرائنا اللي بره بيطلعوا يلبسوا.. ومحمد ابراهيم! (ضحك)

أصوات: (ضحك)

سرى للغاية

عبد الناصر: بنعمل اللبس علشان السفراء بتوعنا.. ده موضوع لازم الحقيقة نثيره.
النقطة الثانية: النياشين اللي موجودة هي النياشين العسكرية اتحدت، ولكن نشوف النياشين كلها ايه، ونحاول نحط نظام..

عامر: النياشين لازم يبقى لها امتيازات الحقيقة.

حسين: إحنا طورنا الجوايز لكن ماطورناش النياشين.. جوايز علمية، والحقيقة بيتصرف كثير على الناحية دى، لكن النياشين لأ.

عبد الناصر: ممكن يعنى تطلبوا هنا الناس المسؤولين والحاجات دى.

الشرباصى: طبعا الموضوع الأول بتاع المقابلات.. ده برضه يعنى يمكن الاخوان الوزراء تصوروا إن ده تضييعا للوقت، يعنى تخصيص وقت معين. هو الواقع المقصود ضرب مثال للجهاز إنه لما يشوفوا س من الناس رايح يقابل الوزير، فهم بطبيعة الحال هيتخذوا من الوزير قدوة.
الناحية الثانية: أنه كمان لما الواحد منهم هيمتت عن المقابلة، يخشى إنه صاحب المقابلة لو قابل الوزير هيشكوا له الموظف لأنه امتت عن مقابلته. اذا كان باب الوزير ميسر، والواقع مكاتب الشئون العامة موجودة من زمان ومكاتب الشكاوى موجودة، وماعتقدش إنها حلت المشكل الموجود؛ فأنا باعتقد المسألة برضه من حيث الأهمية لاعادة النظر يعنى.

عبد الناصر: هو مافيش مانع..

الشرباصى: ده كان موجود من زمان.

عبد الناصر: أنا عندى يوم الاثنين بعد الساعة ١٢ مثلا بيبجى ناس، ولكن الوزارة مليانة ناس وبيشوف ده وده، وبعدين وأنا طالع أقول ده ايه وده ايه وده ايه؟ ماعرفش يعنى اذا كان..

سرى للغاية

محي الدين: لا.. ماهو إحنا يعنى مشينا على أساس مواعيد، وبنجمعهم كلهم فى يوم واحد على أساس مواعيد ثابتة.

الشرباصى: أنا اعتراضى على المواعيد؛ لأن اللى بيبيت فى المواعيد السكرتير مش الوزير؛ لأنه أنا باتصل بالسكرتير وباطلب ميعاد من وزير.

عبد الناصر: والله لو فيه مواعيد لازم تستشيريه.

الشرباصى: الأمر مرتبط بهذا لكن أنا يعنى..

عبد الناصر: يتقدم طلب وأنا أقول فلان أو فلان.

حسين: وإحنا كلنا.

الشرباصى: يعنى أنا عايز العملية تنتظم بحيث إنه تخصيص نص يوم فى الأسبوع، وده هيدى فائدة أكثر من مابضيع من الوقت؛ لأنه الحقيقة خصوصا فى وزارة الخدمات إحنا محتاجين نتصل بالناس، يسمعوا وعايزين ايه نعمله حتى لو كان كلام فارغ! لأنه اللى بيحصل للواحد الـ satisfaction الخاص وهو طالع وزير قابله.. وكيل وزارة قابله.. قابل مدير مصلحة عرض موضوعه، يعنى أعتقد برضه دى مسألة تستحق إنها يعاد فيها النظر.

عبد الناصر: يعنى أديك مثل لما روحنا المعرض وأنا كنت باروح المعرض وأقعد للساعة ٧، طول السكة أنا كنت باحل مشاكل، لو مثلا وزير الصناعة جه بساعد معاه، بس يعنى مافيش مانع بتدى امكانية إنه يشوف بنفسه، فى نفس الوقت بتدى دفعة للى تحت إنهم يحلوا. ابتدى إنت بنفسك اعمل العملية دى، نبتدى إحنا.. ايه المانع إن احنا نبتدى؟

صبرى: لا.. مافيش مانع، بس فيه ناس عندهم سياسة..

سرى للغاية

الشرياصى: يعنى أنا قعدت مع واحد جاى يشكوا لى مثلا فى وزارة من الوزارات - ده المفروض إنى هابعتها للأخ على - يعنى هم المفروض إن احنا نقابل الناس ونستمع لهم، لكن هى الوزارات اللى ليهم مصالح فيها دى ألزم من أى ناحية ثانية.

حسين: هو يمكن فيه ناس قافلين على نفسهم لدرجة إن كان فيه محافظين بيطلبوا مقابلتهم يرفضوا إن هم يقابلوهم، يقولوا لهم: هات الموضوع والتفاصيل بتاعته، وإبعت لى مذكرة! وماعرفش يعنى كلام يمكن عايز يتفاهم معاه بخصوص موضوع.

الشرياصى: المفروض المحافظين يسهلوا مقابلاتهم للناس، يعنى بيجوا ناس مالمهمش أى شغل يقابلوا المحافظ فيقابلهم؛ فمبسوطين جدا من ده لأنه مثلا بيقدر يقابل المحافظ ويقول له: إنه مثلا شغلانته كذا والمحافظ يدى له كلمتين.. فالواقع المسألة من الناحية النفسية.

عبد الناصر: بنعملها مبدئيا، وانشاءالله على أول الأسبوع اللى جاى هنطلع ونبتدى العمليات دى. وأنا يهمنى برضه فى هذا الموضوع فيه نقطة كنت عايز أتكلم فيها..
أولا: بالنسبة للجنة التنفيذية العليا اللى فوضت أنا بتكوينها، أنا قلت فى التنفيذ إنها هتبقى هى مجلس الرئاسة.. هل حد عنده رأى آخر بالنسبة لهذا الموضوع.. بالنسبة لتكوينها؟

الشرياصى: هو أصلا بالنسبة للجنة التنفيذية العليا هى المفروض بعد الانتخاب هتبقى عددها فى حدود كام؟

عبد الناصر: هو أنا متصور إن اللجنة التنفيذية العليا بعد الانتخاب هتبقى ٢١، يعنى العدد اللى هى اللجان فيه ٢١.

حسين: هى دى اللى هانسميها اللجان مقابل اللجنة المركزية؟

سرى للغاية

صبرى: اللجنة السياسية..

حسين: لأ.

عبد الناصر: اللجنة التنفيذية العليا اللى هى تختص بالموقف السياسى، كونا نعمل لجنة دائمة بعد كده بنعمل مثلا ٦ أو ٥ منعقدة باستمرار.. ده شئ تانى.

صبرى: مش فيه هيبقى منبثق من المؤتمر؟

عبد الناصر: اللجنة المركزية.

صبرى: آه.. اللجنة المركزية.

عبد الناصر: اللى هى اللجنة العامة.

صبرى: آه.. اللجنة العامة.

عبد الناصر: كل ده هنحله. هى اللجنة العامة لازم توصل لـ ١٠٠؛ لأنها علشان تمثل المحافظات كلها وتمثل كل اللجان. بيبجى اللجنة التنفيذية العليا اللى هى بتساوى المكاتب السياسية يعنى ٢١ - ١٨ - ١٧ - ٢١ يعنى آخر حدود.

ممكن الـ ٢١ اللجنة اللى بتجتمع كل أسبوع، وممكن يبقى فيه لجنة دائمة بتجتمع يوميا، زى ما عملنا فى مجلس الدفاع، بعد كده لازم يبقى لنا من ٥ أو ٧. هو أنا الحقيقة ليه فتحت الموضوع ده؟ هو أنا عندى كان.. مامسكش أى حاجة. لما آجى أطلع اللجنة التنفيذية العليا - زى دى - مجلس الرئاسة يبقى هو ده اللجنة التنفيذية العليا، وده يعنى أريح.

سرى للغاية

النقطة الأولى اللى هى طبعا فيها مشكلة، ماكانش فيها حد مسيحي برضه دى يعنى نقطة الواحد ياخذها فى الاعتبار.

النقطة الثانية: إن اذا كنا هانزود.. هانزود من مين؟ ما هانزود من الوزراء. يبقى اذا لابد تزود من الوزراء كل عام ورايح ندخل ٥٦ - ٥٧ - ٥٨، يعنى عدد بهذا الشكل. تفترض هاخذ ٦ أو ٨ دى ليها حكمة إن فيه وزراء مادخلوش، هل فيه رأى تانى؟ من بره هناخد أحسن ناس، ولو كان فيه حد بره كنا جيبناه فى الوزارة. هل يعنى نطلع قرار كده من مجلس الرئاسة ونمشى بعد..

صبرى: هانزود.

عامر: أكبر عيب هو زيادة اللجنة العامة، معناها إن احنا قفلنا الباب وإن دى هى اللى هتستمر متهيألى بعد المؤتمر ما يعدل.

عبد الناصر: يعنى بيجى فى اللجنة الخاصة.

الشرباصى: بس هو فيه برضه ناحية تانية.. يعنى يمكن العمل نفسه يقتضى عدد أكثر، ثم إحنا محتاجين برضه فى العمل لبعض الوزراء؛ يعنى مثلا وسائل الاعلام كلها لابد إنها تكون برضه فى خدمة هذه اللجنة، لأنه بعض الخدمات - المواصلات وحاجات من هذا القبيل - أعتقد إنه برضه وجود الناس المشرفين عليها داخل اللجنة قد يفيد فى عملية اللجنة نفسها، العملية متسعة فمعرش يعنى..

عبد الناصر: الحقيقة هو بالنسبة للوزراء، أنا رأيت إن هم مش هيشغلوا.. يعنى الحقيقة الشغل ده عاوز يتطور، يعنى هى العملية..

الشرباصى: بس كون وجوده يخليه فاهم يعنى ده - حتى مااشتغلش هو - بحيث إنه يكون فاهم ايه بالضبط التوجيه المطلوب منه.

سرى للغاية

عبد الناصر: مافيش مانع إن احنا نعمل جلسة تانية من مجلس الرئاسة ومجلس الوزراء كله وبتتكلم فيها على كل الشعب؛ على أساس إنهم أعضاء طبعا فى الاتحاد الاشتراكى.. مافيش ما يمنع ده مطلقا. وبعدين وسائل الاعلام فى ايدينا يعنى كلها اللي عايزين نعمله بنعمله، كذلك المواصلات فى ايدينا. بارد على النقط يعنى مش بارد على الحكمة، وياقول: الاعلام.. اللي احنا عايزين نعمله بنعمله، المواصلات.. اللي عايزين نعمله بنعمله..

حتى اذا طلعت اللجنة دى بس بنجمع مؤتمر لمجلس الرئاسة ومجلس الوزراء مع بعض، بتتكلم فى عملية التنظيم الشعبى وكل حاجة فيها بره شغل التنفيذى كله. وده باعتبره ضرورى؛ على أساس إن ممكن حتى دول يدخلوا اللجنة فى زى اللجنة المركزية واللجنة العامة، مش هابعدهم يعنى عن العمل السياسى؛ هم أساسا كل وزير هيكون عضو فى اللجنة المركزية أو اللجنة العامة.

رفعت: عملية الـ ٥٠% ماتتطبقش على اللجنة يعنى ٥٠% عمال وفلاحين.

عبد الناصر: ماأظنش.. يعنى باتصور الأمور جميعا باقدر أمشيها لغاية يعنى..

حسين: المؤتمر العام.

عبد الناصر: لا.. والنقطة إحنا النهارده بنمثل العمال والفلاحين.

رفعت: لا.. باقول على أساس يعنى كان فيه زيادة فى اللجنة التنفيذية.

عبد الناصر: دلوقتى يعنى؟

رفعت: ما سيادتك بتقول فى حدود ٢١.

عبد الناصر: آه.. تحديد ٢١ يعنى هو الحقيقة أنا متصور هذه اللجنة يجب أنها تكون خارج التعديل؛ لأن دى اللجنة اللي هى بتكون إنها بتمثل البلد.

سرى للغاية

محي الدين: الطليعة.

صبرى: واللجنة العامة هل هي تطبق عليها؟

عبد الناصر: ايه؟

حسين: ممكن يبقى فيه شوية فى اللجنة العامة ممكن..

عبد الناصر: اللجنة العامة؟

حسين: ممكن ندخل فيها نسبة من العمال.

عبد الناصر: هو وجود العمال أو الفلاحين فى اللجنة العامة اللي يعنى هو أنا أما حسبتها وجدت..

حسين: هو كبار الاتحادات ممكن يجوا.

الشافعى: فى مستوى الـ ٥٠٪.

عبد الناصر: هيكون فيه مجلس أمة.

حسين: آه.. مجلس الأمة.

صبرى: ماهو علشان كده الفكرة بتاعة إنه مجلس الأمة بينبثق من اللجنة العامة، لو كان كده تبقى اللجنة العامة لازم تشمل ٤٠٠ على الأقل.

عبد الناصر: لا.. هو مجلس الأمة يعنى بنقول هيتمثل من المؤتمر.

سرى للغة

حسین: المؤتمر؟

عبد الناصر: المؤتمر إن هو بقی المجال واسع. هو مجلس الأمة هینبثق أصلا من هل الاتحاد الاشتراکی بجمیع أعضاءه..

صبری: التنظيم.

الشرباصی: آه.. أنا كنت عایز أقول نقطة حساسة: هو كون المجلس اللی اتعمل مافیئش مسیحی!

عبد الناصر: نعم؟

الشرباصی: كون المجلس ده مافیئش مسیحی، ده معقول لأن الرئاسة سیادتک تنازلت عن جزء من سلطنتک، والمجلس المفروض إن رئیس الجمهورية مسلم.. دی مافیئش اعتراض.

عبد الناصر: مجلس الرئاسة.

الشرباصی: ماعلش بقی أنا عاوز أقول اللجنة التانیة.. الحساسة تمتنع لو إن سیادتک قلت خلیها ١٥ وبالأقدمیة هیجی کمال استینو.

عبد الناصر: آه.

الشرباصی: بقی فی هذه الحالة مادام المبدأ اللی سیادتک ماشی علیه ماحدش هیحضر لو إنت قلت ١٦ برضه مافیئش، لكن برضه النقطة الحساسة إنه حتی اللجنة العلیا للاتحاد القومی أو تشکیل الحزب الاشتراکی مافیئش واحد منهم.. بنبقی یمكن انعکاساتها.. لكن مجلس الرئاسة ما یقدروش یقولوها.

سرى للغاية

عبد الناصر: لا.. هي ماحدث يعنى.

طراف: لا.. لا.. مافيش اعتراض.

عبد الناصر: نعم؟

طراف: لا.. مافيش اعتراض على هنا.

الشرباصى: أنا عايز أقول برضه..

صبرى: ابراهيم نجيب.

عبد الناصر: هو الحقيقة كانت تعويض عن..

الشرباصى: لا.. ما هو أصله منطوق..

عبد الناصر: نعم.

الشرباصى: منطوق مايطمعوش فيه مثلا لأن رئيس الجمهورية فى نص الدستور مسلم وده سلطان، لكن النقطة الحساسة الثانية وهى اللجنة التنفيذية والاتحاد الاشتراكى لو إنه مشى على المبدأ..

عبد الناصر: هى دى النقطة.

الشرباصى: ١٥ ماحدث هيتضايق، يعنى مادام مبدأ ماشيين عليه بالأقدمية بالموجودين بالحكم مايفاش فيه مضايقة، وييجى هو يدخل كمال.

سرى للغة

عبد الناصر: هو النقطة الحقيقة هى.. هل نقدر نعمل لجنة تنفيذية للاتحاد الاشتراكى من التنظيم الشعبى بدون مسيحى!؟

أصوات: لا.. مش ممكن.

عبد الناصر: حزب الوفد كان فيه مكرم عبيد، لما طلع النقراشى خده بتاع ده وحطوه، والحزب الوطنى كان فيه مين؟

الشرىصى: كان فيه الدكتور ده بتاع بنى سوف.

عبد الناصر: قصدى يعنى الشعور لو طلع اللجنة..

حسين: لا.. وجود واحد قبطى كويس.. يعنى يدى منظر كويس فى العملية.

عبد الناصر: هل هى قبطى تمشى يعنى..

حسين: لا.. أحسن يبقى فيه قبطى، أنا رأى أحسن.

السادات: قطعاً يعنى يبقى فيه قبطى فى اللجنة.. هى العملية شعبية.

حسين: بس مش ضرورى بالأقدمية؛ يعنى موضوع الأقدمية حاجة وموضوع إنه واحد قبطى بيحى حاجة تانية.

عبد الناصر: يعنى برضه أنا مش شايف الحقيقة الوزراء تبتدى العملية..

السادات: مايجى استينو ياريس يعنى بالنظر الى بره لوحده.

سرى للغاية

عبد الناصر: برضه ببيان.

حسين: وماله ماتبان! هو مش تأثيرها أحسن ماتبان!

أصوات: لا.

عبد الناصر: هو الحقيقة يعنى شكل إن أنا لازم آخذ واحد قبطى..

أصوات: آه.

عبد الناصر: بحيث إن أنا لازم آخذ.

الشرباصى: أه.. ١٥ - ١٦.

عبد الناصر: لازم إن أنا لازم آخذ؛ يبقى غلط على طول تبقى يعنى العملية لكن اذا خدت ٣ تانيين، ٥ تانيين..

الشرباصى: بالأقدمية.

طراف: يبقى كويس.

عبد الناصر: وبعدين هذا لا يمنع أكيد إن احنا نستفيد من إن الناس تيجى. يعنى الحقيقة لازم نعمل الآتى:

ونقول: لازم يتفرغوا. أنا رأى فى المستقبل إن اللى هيشغل فى الاتحاد الاشتراكى يبقى متفرغين..

واللى يتفرغوا ندخل ناس تانيين برضه نفتح السكة..

أصوات: آه.

سرى للغاية

عبد الناصر: يعنى نشتغل وأنا فى رأى إن احنا هنا هو ده شغلنا.. بندى ناس سياسة البلد، المفروض إننا الحقيقة هو ده الاتحاد، والاتحاد هو يشغل الدولة.

ابراهيم: بس هم مايزيدوش كثير يعنى.

عبد الناصر: لما جينا ندور فى مجلس الرئاسة هو مين.. يعنى فيه واحد قعد عشر سنين كلنا قعدنا عشر سنين.. كلنا مع بعض من أيام الثورة، بتيجى حتى بعد كده تدور على حد بيبقى صعب؛ لأنه يعنى.. حسن يعنى سنة أو سنتين! (ضحك)

أصوات: (ضحك)

ابراهيم: مايش يعنى ٣ - ٤ من مؤتمر القوى الشعبية.

محي الدين: هنلاقى.

عبد الناصر: لا.. هذا الكلام خطأ، ليه؟ أنا ماقدرش أقعد مع ناس وأتكلم بصراحة زى مابتكلم معاكم هنا، ماقدرش أتكلم معاهم وإلا هتبقى جلسة صورية! جلسة صورية بيبقى فيه خطاب مطبوع وكذا، ويمكن حتى لغاية النهارده فى مجلس الوزراء ماقدرش أقعد وأتكلم هذا الكلام لسبب بسيط جداً؛ لأننى عارف إن ده بيتكلم وواحد بيحكى.. يعنى أنا النهارده قلت على العمليات بتاعتنا كلها.

[الرئيس يقرأ برقية]..

من الزعيم السلال..

الموقف فى مدينة صعدا خطير جداً، وصلت داخل المدينة قوات سعودية معها مدافع بتضرب فى المدينة داخلها وحولها، والضرب بيتكرر والبيوت فى المدينة ضعيفة. فى معركة الشمال نحن نركز قواتنا فى الشرق.

سرى للغاية

فأرجو الأمر مواصلة الضرب بالصاعقة بلا رحمة، كذلك أرجو ارسال قوة نارية كبيرة ضارية.

الشعب اليمنى سيستقبل ذلك بكل ترحيب.
والسلام عليكم.

عبد الناصر: هو بيضرب على ارتفاع..

صبرى: ٤٠ الف قدم.

عبد الناصر: وبعدين أنا امبارح طلبت من حد يروح يبحث المطارات؛ يعنى على أساس ممكن لو بعتنا Ilyushin ميچ ١٧ ممكن هتاخذ وقت.

حسين: أو مقاتلات.. هو المقاتلات بتاخذ صواريخ.

عبد الناصر: ميچ.. آه.

حسين: ميچ بالصواريخ تبهدلهم.

صبرى: ميچ ١٧ عايزة ٢ كيلومتر على الأقل.

عبد الناصر: هو ليه الممر هناك..

حسين: طيب إحنا ما عندناش طيارات قديمة مقاتلة؟

سرى للغاية

عبد الناصر: ايه؟

صبرى: فيه Fury بس مش عارف والله.

حسين: Fury فيه؟ أصل العملية..

عبد الناصر: الـ Yak تشيل قنابل وعملنا لها صواريخ.. يعنى دلوقتى فيه صواريخ على الـ Yak.

حسين: يعنى قطعاً الـ Fury مدى أطول وقوة وتسليح أتقل.

صبرى: لا.. ماتفرقش.

عبد الناصر: إيه الفرق؟

صبرى: الـ Fury سريعة بس أسرع من الـ Yak.

عبد الناصر: وأنا بقالى ٣ أيام كل يوم ببيجى لى رسالة من السلال.. (ضحك)

أصوات: (ضحك)

الشرابصى: هو مرعوب شوية.. العملية صعبة.

الشافعى: باين عليه مافيهوش فائدة، يعنى ده الذعر بتاعه يكون اللى منعكس عليه.

عبد الناصر: لا..

سرى للغاية

صبرى: من أول يوم! (ضحك)

معى الدين: هى Ilyushin بتاعة المواصلات دى بيعملوها، مجهزينها دلوقتى بقنابل، ودى تأثيرها ايه فى التتشرين بتاعها؟

عبد الناصر: عندهم طيارات هناك ١٠ Ilyushin.

صبرى: آه.

عبد الناصر: اللى هى ١ - ٣.

صبرى: أيوه.

عبد الناصر: ماحدث عندنا بيقدر يركبها..

صبرى: انما الطائرة سهلة أصلها.

حسين: أصل أى حاجة تشيل قنابل وتتشن.

صبرى: الـ Yak كويسة أوى.

حسين: الـ Yak ؟

صبرى: آه.

حسين: أنا أصلى ماعرفهاش.

سرى للغاية

عبد الناصر: أنا رأيت إن الضرب بالطائرات مع باقى الطائرات وباقى المدفعية.

محي الدين: فى الأخاديد والجبال.

عبد الناصر: بتنزل القنبلة بتعمل زوبعة وما فيش حاجة، لكن اذا على المدينة بقى تضرب..

محي الدين: المدينة أو الحشود أو المتحركين.

البغدادى: وبعدين الناحية الثانية: الانجليز سابوا لهم مخلفات، ده تأثيره يعنى قد يستحسن استخدامه مع قوة ضارية.

عبد الناصر: نقول الآراء بالنسبة لموضوع اللجنة.

حسين: هو وجود واحد مسيحي فى اللجنة يعنى كويس.. أويده.

محي الدين: والله أنا هنا رأيت الإبقاء على اللجنة كما هي؛ لأن أى زيادة بتفتح الباب بالنسبة للنسبية.. نظرية النسبية، زى كده مين هناخده ومين مش هناخده. وبعدين موضوع مسيحي ده يعنى ممكن الناس طبعا كلها فاهمة إن هذه اللجنة يعنى اللجنة التنفيذية، وما فيش أى رد فعل لا من المسيحيين ولا من المسلمين بالنسبة لهذا الموضوع. واذا كانت اللجنة التنفيذية بتصدر بهذا الشكل، دي تعتبر لجنة تنفيذية مؤقتة لغاية ما تيجي اللجنة التنفيذية اللى هي الأساسية بالانتخاب يعنى.

عبد الناصر: لا.. طبعا المؤتمر هيكون فيه مسيحيين.

أصوات: آه.

سرى للغاية

محي الدين: واللجنة تحضيرية كمان، كان فيها مسيحيين.

عبد الناصر: لا.. أنا تقديري اذا طلعت اللجنة مفيهاش واحد مسيحي، ليه؟ يقول لك حتى المسيحيين اللي في المؤتمر، يقول لك: ماحنا أخذنا على إن مافيش حتى واحد مسيحي فيها، بعدين يعنى حتى ماهياش شكلها..

حسين: هي مفيدة يعنى مطلوب المسيحيين يدخلوا في التنظيم.

محي الدين: هي جاية.. أنا باقول هي جاية بعد كده.

عبد الناصر: أما بتبنى البيت.. طب بتبنى البيت وهتخط الأساس.

صوت: يعنى المسيحيين جابين قطعاً وهيوزعوا، يعنى باتكلم على أنها فترة انتقال.

عبد الناصر: يعنى ناخذ ٣، ناخذ ٤؟

الشرياصي: ٤ علشان ماتبقاش.. فوزى والقيسونى وكمال وعزيز صدقى لو وقفنا على كمال هيقولوا إن احنا قاصدين ناخذ واحد قبضى.. يبقى ٤.

صبرى: هو سيادتك فيه نقطة أثرتها فى الأول.

عبد الناصر: إتفضل.

صبرى: يعنى لو بناخذ مبدأ يعنى الوزراء اللي كانوا موجودين من سنة ٥٦ أو ..

عبد الناصر: من سنة ٥٦ مصطفى خليل ومين تانى؟

سرى للغاية

الشرباصى: بس.

صبرى: علشان مايتقالش ليه ٣ وليه ٤ وليه مش ٥ وليه مش ٦ يعنى؟

عبد الناصر: يعنى برضه ايه اللى بناخده؟

صبرى: ماعرفش ببقى..

الشرباصى: هو بعد مصطفى بيحى مين؟

صبرى: عباس.

محي الدين: وبعدين حاتم.

الشرباصى: بس دول ٥٦.

حسين: برضه النظرية بتاعة إن أنا ماقلش الباب من دلوقتى فى اللجنة وأدى أمل للناس، ممكن أوى إنه ببقى فيه واحد ماهواش وزير وموثوق فيه ١٠٠٪ وكويس و ٢٤ قيراط، يعنى متهيألى الأيام اللى جاية هتورينا برضه.

عبد الناصر: فين هو؟

حسين: لا.. يعنى فيه ناس برضه ظهروا فى المؤتمر وفى اللجنة واشتغلوا.

سرى للغاية

عبد الناصر: لا.. دى عملية يعنى مؤقتة. هى العملية كانت يعنى السبب الوحيد إنى آخذ واحد مسيحي، يعنى كوني باقول: آخذ كمال استينو وأحطه هنا..

حسين: طب وماله لما تبان ياريس؟

الشرباصى: لأ.

عبد الناصر: يعنى الحقيقة يبقى فيه أسلوب ونمشى فى المستقبل على أساس..

حسين: يعنى هو من الناحية العملية باستمرار، لو حاولنا إن احنا نعملها حرة فى أى حاجة مش هيجى ولا واحد، يعنى الحقيقة من الناحية العملية باستمرار معروف إن احنا جايبينهم علشان كذا، وهم عارفين كده والدنيا كلها عارفة كده، وبيتهيالى تيجى بجميلة إن احنا بنعمل كده يبقى أحسن.. يعنى ده رأى.

محي الدين: فى اعتقادى كده علشان برضه مانفتحش الباب بالنسبة لموضوع النسبية الحقيقة.

عبد الناصر: ايه النسبية دى مش فاهم؟

محي الدين: يعنى واحد يقول: أنا جيت والتانى يقول: أنا ماجيتش.

عبد الناصر: نخليها بالأقدمية ونجيب كمال.. فيه حد تانى؟

رفعت: فيه يعنى مثلا وزارة الشباب يمكن وزير حديث، لكن صلته يمكن بعمل بالاتحاد الاشتراكي يمكن أفضل.

سرى للغاية

عبد الناصر: بالنسبة للوزراء من المهم يعنى كلهم بيشتغلوا؛ بتاع السياسة بيشتغل، وبتاع الاعلام بيشتغل وبتاع العمل بيشتغل، مش كده؟ يعنى أنا بقول: لايد هنعمل الجلسات بيحضروا فيها كل الوزراء وهنتكلم فيها على التنظيم الشعبى، ولو مرة كل شهر علشان الوزراء مايعدوش عن..

حسين: يمكن قصد كمال إن فيه بعض الوزراء هيشغلوا شغل كثير فى التنظيم الشعبى، وده مايمنعش برضه السادة وزير الشباب أو حد تانى من الوزراء يشغلوا فى التنظيم الشعبى ويبقى لهم مراكز فى التنظيم الشعبى، بس مش ضرورى يبقى جوه اللجنة التنفيذية العليا لكن فى اللجنة العامة.

عبد الناصر: آه.

حسين: ويشترك وبيقودوا فى التنظيم فى ناحية معينة من النواحى.

عبد الناصر: هو العملية اللي جاية دلوقتى هى علشان ناخذ.. هل ناخذ استينو أو ناخذ بالأقدمية؟

حسين: أنا باقول: مافيش مانع أن ناخذ استينو.. يعنى ده رأى.

عبد الناصر: هل ناخذ استينو وحده؟ اللي موافق على كده يرفع ايده.

عبد الناصر: ؟٤

صبرى: ٥.

عبد الناصر: ليه؟

حسين: أصل ماكنتش رافع ايدى! (ضحك)

أصوات: (ضحك)

سرى للغاية

عبد الناصر: خمسة، ستة.

السادات: لا.. اذا كان صاحب الاقتراح مرفعش ولا اللى معارض رفع! (ضحك)

عبد الناصر: اللى موافق بالأقدمية يرفع ايده.. ١ - ٢ - ٣ - ٤ - ٥ مين تانى؟

صبرى: فوزى والقيسونى واستينو..

الشرباصى: عزيز قبل ولاّ كمال؟

صبرى: ومصطفى خليل..

الشرباصى: كمال أقدم جاى قبل دول بشهرين ثلاثة لكن مصطفى وعزيز فى يوم واحد.

البغدادى: ولاّ استينو؟

الشرباصى: لا.. استينو قبلهم بشهرين ثلاثة.

عبد الناصر: هو دلوقتى فيه اقتراح.. لغاية استينو بس، وفيه اقتراح تانى..

حسين: لا.. بدل هيجى عزيز صدقى، لو جبت مصطفى اللى جاى معاه فى نفس اليوم ده.

الشرباصى: ٥٦ دول كلهم.

طراف: هى العملية محتاجة لعدد كبير يعنى للجنة دى هى العملية كبيرة مش صغيرة.

سرى للغاية

ابراهيم: بس دول مش هيشغلوا.

الشرياصى: لا.. بيشغلوا.

ابراهيم: باقول لك أنا مش هيشغلوا بالعقل يعنى.. الأيام بيننا.

طراف: هو فوزى جه فى ديسمبر ٥٢، ده جه ورا فراج فايض فى ديسمبر ٥٢.

معى الدين: ده فى جلسات مجلس قيادة الثورة.

عبد الناصر: نحيب عباس فى حاجة؟

حسين: آه.. يعنى لو دول جم الحقيقة؛ يبقى حرام إن مانجيش عباس فى حاجة!

عبد الناصر: فلا بد إن احنا نعمل.. القيسونى، فأى واحد بيقدر الحقيقة يعنى أى واحد..

حسين: جايز نلاقى حد.. يعنى ما عرفش إن كنا هنلاقى حد، يعنى دول اللى نكون عارفينه وواتقين منه ١٠٠٪، كمان شرط أساسى طبعا كونه يبقى وزير أو مش وزير مانيش عارف.

عبد الناصر: طب يعنى مين اللى..

حسين: لو عباس أقدم من الثانى ده أقدم بكثير.. ده الأقدم.

صبرى: بالنسبة للحاجات اللى من مجلس الرئاسة للمجلس التنفيذى..

معى الدين: التعيينات.

سرى للغاية

صبرى: بالنسبة للهِلال الأحمر، عادة اللى بىرأس الهِلال الأحمر بىكون شخسىة كبرىة فى الءولة وتصل الى رئىس الءمهورىة.

حسین: رئىس الوزراء یقءر یكون له نائىب علشان یقءر بىأشءر..

صبرى: یعنى ءى كانت ملاحظءة بس.

حسین: فى ءلسة المءلس التنفىءى كنت كلمت على وقلت له: هو بس بالنسبة للهِلال الأحمر بالـ team اللى معاه اللى بءه یتعین.

طراف: بالنسبة للنبوى.

حسین: بىصدر بىها قرار من رئىس الءمهورىة.

عء الناصر: ایه رأىك؟

الشافعى: أنا رأىى على ومعاه النبوى.

طراف: صء.. هو الءقئقة یعنى أقرب.

أصوات: النبوى.

حسین: هو ءه بىستاهل أوى یعنى.

مءى الءین: هنا بىقول على الأمانة العامة اذا تركنا الى الاءراء الرئىسىة..

سرى للغاية

الشرباصى: بالإضافة الى..

عبد الناصر: فيه حاجة؟

صبرى: لا ماشى.

حسين: متهيألى فيه غلطة فى الكلام اللى هنا؛ هو القانون يتعدل ويتشال، وتتأخذ السلطة اللى كانت موضوعة لنائب رئيس الجمهورية الى المجلس التنفيذى فيما يتعلق بالأشياء اللى كانت موكولة الى اللجنة المركزية، وإذا كانت اللجنة التنفيذية تخلى لجنة الادارة المحلية فى المجلس. أنا رأبى إن يبقى فى المجلس لجنة الادارة المحلية، تبقى تأخذ هى السلطة بتاعة اللجنة التنفيذية أو تخلى المجلس يأخذ الكل. لكن اعادة اللجنتين.. هعيدهم زى دى كانت لجنة الخدمات المركزية ولجنة الخدمات التنفيذية، فلا يمكن رجوعها.. يعنى غلطة فى الصياغة.

صبرى: قابلت عباس أنا اتكلمت معاه.. ورأيه اللجنة المركزية هيرأسها مع رؤساء الخدمات ودى بتحط تخطيط وسياسة، وبعدين يعمل لجنة محلية داخلية هى بينها وبين المحافظات فى التنفيذ، بتحط البرامج للتنفيذ.

صبرى: هو فيه موضوع واحد بس بتاع المكافآت هم عملوا اقتراح..

عبد الناصر: ايه؟

حسين: ١٠ و ٥.

صبرى: ١٠ و ٥ بس مافيش حد أدنى؛ لأنه وجدوا إن فيه عمال ماهياتهم ٣ جنيه و ٤ جنيه.

معى الدين: لا.. الحقيقة عصام متحفظ جدا.

سرى للغاية

صبرى: هو المادة الأولى: يمنح الموظفين والعمال فى وزارة الزراعة والاصلاح الزراعى واصلاح الأراضى فى المحافظات الذين ساهموا بأعمال بارزة فى أعمال مقاومة آفات القطن.. بحد أدنى ٥ جنيهاً بالنسبة للعمال.. نعملها ٦ فى المتوسط.

محي الدين: خليها خمسة.

حسين: لو بتوع الرى كمان اللى بذلوا مجهود انضموا للفئة الأولى يبقى كويس وفيه ناس برضه بذلوا مجهود، فالفئة الأولى لو انضم لهم بتوع الرى اللى قاموا بأعمال..

صبرى: موجودة.

حسين: الرى موجودة؟ موجودة الزراعة والاصلاح الزراعى، لكن الرى اذا كانوا بذلوا مجهود كويس ياخدوا. هى دى فى المقاومة بس ولا؟

السادات: فى المقاومة.

حسين: لو فيه المقاومة بس يبقى مالهاش دعوة.. خلاص.

محي الدين: فيه موضوع خاص بالأولاد فى قطاع غزة اللى جايين مجموع كبير وهم عددهم ١٥٠ واحد.

حسين: ولو رسيت على ١٥٠ مافيش مشكلة أنا عارف إنهم حوالى ١٠٠٠.

صبرى: أقل.

حسين: لو رسيت على ١٥٠ مافيش مانع ناخذهم.. بناخذهم ياريس.

عبد الناصر: سلام عليكم.